

71

FLAMINII

NOBILII DE VERĀ, ET


FALSA VOLVPTATE

LIBRI DVO.

AD FRANCISCVM MEDICEM

FLORENTINORVM, ET

SENENSIVM PRINCIPEM.



3

12

11

FLAMINI

WOMAN DE WELT

ADAM DE WELT

ADAM DE WELT

ADAM DE WELT

ADAM DE WELT

ADAM DE WELT



ADAM DE WELT

FRANCISCO MEDICI FLO-
RENTINORVM, ET SENENSIVM
PRINCIPI.

Flaminius Nobilius. S. D.



*Q*UOD illi, qui soluendo
non sunt, neque in tempo-
ris intervallo spem habent,
facere consueverunt, ut bo-
norum suorum possessione
creditoribus cedant; idem
mibi Princeps Amplissime
faciendum video: Ut cum nullam multorum secu-
lorum Principis parentis tui erga me meritorum par-
tem referenda gratia consequi unquam me posse spe-
rem, omnia mea, meque ipsum, & illi, & tibi, qui
suus haeres es, necessario tradam, atque addicam. Hoc
inter meum, ac decoctorum factum intererit; quod
illi fortunarum suarum alios fieri dominos molestissi-
me ferunt, neque interea creditores satis sibi esse fa-
ctum putant: ego verò eximia patris tui virtute ca-
ptus, quam tu pulcherrime imitaris, libentissime me
vobis dedo; neque vos non satis precij ob collata in
me beneficia, vobis à me persolutum iri conquera-
mini pertimesco, qui benefactorum vestrorum non
aliam vobis proponere mercedem soletis quam lau-
dem, decus, honestatem. Cum igitur apud me essent
libri duo de vera, & falsa voluptate proxime prae-
* ii

rita estate conscripti, quod tempus nostri ordinis ho-
minibus vacuum, ac solutum est, eosque vobis debe-
ri intelligerem, ad te deferendos iudicaui, cuius eta-
ti, quæ in illis tractantur, videntur quodammodo ma-
gis convenire; quique nihil antiquius habere osten-
disti, quam excolere optimis disciplinis animum.
Non tam enim imperio, & opibus, quam rerum ma-
ximarum cognitione excellere verè regium censui-
sti. Itaque, & antea apud Italos, & nunc in ista
Maximi Regis aula, id est in pulcherrimo totius or-
bis theatro ea virtutis indicia præbuiisti, ut nemo
dubitet Principatu isto tuo nihil apud posteros ad-
mirabilius fore. Vale, & his meis erga te
observantissimi clientis officijs, quan-
do maiora præstare non pos-
sum, ne offendaris.

QVÆ DVOBVS DE VERA, ET
FALSA VOLVPTATE LIBRIS
CONTINENTVR

OMnis hæc de vera, & falsa voluptate
questio satis cōmodè duobus libris
videtur explicata. Nam cum ea sit ingenti
nostri conditio: vt primò rerum quasi vm-
bram videat, deindè ad vim, & naturam co-
gnoscendam accedat; idcircoquè probabi-
libus rationibus erudiri debeat, antequàm
necessariis, & ex rei natura ductis argumen-
tis scientiam consequi possit; primo libro
Bartholomæus Riccius, & Flaminius Nobi-
lius apud Vincentium Madium loquentes
inducuntur, ac de voluptate probabiliter
disputantes; secundo autem libro Madius
ipsehuius rei certam, quantum ab autore
præstari potuit, scientiam tradit. Riccius
multis rationibus, multis exemplis, multis
naturæ testimoniis probat, longissimè à bo-
ni natura abesse uoluptatem. Contrà Nobi-
lius multas, & ipse causas affert, quam-
obrem voluptatē statuere summum bo-
num oporteat. Argumenta Ricij hæc sunt.
Quòd voluptas non reddat hominem bo-
num, sed improbū potius, ac scelestum,
Quòd sit proprium, peculiarequè bruto-

rum animantium bonum, **CAVO**
Quòd principis hominis vita, ex qua de re
liquis hominibus est iudicandum, volu
ptates omnes reiiciat, & expellat,
Quod à voluptate maximi dolores, & gra
uissimi morbi proficiscantur.

Idcirco voluptatem nullo pacto hominis
bonum esse statuendam.

Exempla autem ex Persarum regio, ex Rò
mano Imperio, ex multis illustribus vi
ris petuntur.

Naturam etiam de hac re tacitam iudi
catè ostenditur; quòd pueri prae discendi
studio omnes voluptates contemnunt; quòd
in voluptatibus capiendis lucem fugiamus;
cuius tamen lucis animus noster naturà
sit amicissimus; quòd omnes ferè maxi
mo in illos odio incendamur, qui volu
ptariam viuendi rationem delegerunt. Hinc
labor, industria, vigilantia, assiduitas com
mendantur. Præcipuè autem tenera ætate
in bonis artibus esse laborandum concludi
tur. Ex altera parte rationes huiusmodi à
Nobilio pro voluptate afferuntur. **modo**
Quòd voluptas notioni felicitatis maxi
mè coniuncta, atquè intima sit.

Quòd dolor omnis, sed meherclè etiam la
bor sit malum, ac fugiendum, contra

riorum autem contraria soleant esse consequentia.

Quòd sensus, qui nobis à natura utiliter sunt tributi, in voluptatem mirificè propendeant.

Quòd ex honestis actionibus, et contemplatione maxima voluptas hauriatur.

Súmum quoddam bonum esse censendam voluptatem. Dum autem hæ rationes explicantur, et confirmantur multa interim ex Ricci argumentis refelluntur. Atquè hæc sunt, quæ continentur primo libro.

In secundo autem Vincentius Madius, cum, non modò Nobilius sed etiam Malegutius, & Rugerius, qui duo novi auditores accesserant, multa de illo quererent, totum hunc locum cumulatissimè explicare aggressus à voluptatis definitione initium sumit, illiusquè partes explicat; & multas dubitationum nubeculas dissipat.

Hoc iacto fundamento, pertineat ne voluptas ad sensum, & mentē, an potius ad appetitum, & voluntatem disquirat, Consistat in perceptione; quam latini rectam, vel in altera potius, quam reflexam nominant:

De dolore, & causis doloris, & quomodo in mente, quomodo in sensibus locum ha

rebeat ex Platōne, & Aristotele.
Quomodo sit diuidenda voluptas, nec Pla-
tōnem ab Aristotele discrepare,
Quot, quantæquē sint mentis voluptates,
Voluptatem, quæ ad sensus pertinet, mentis
voluptate longè inferiorem, esse,
Cur voluptas ad tactum pertinens maxima
videatur,
Inter sensuum voluptates esse alteram alte-
ra præstantiorem,
Cur omnes auidius sensuum, quam mentis,
& intelligentiæ voluptates sequamur,
Quæ voluptas sit notioni felicitatis con-
iuncta,
Euentu quodam posse aliquā voluptatem
reddi malam, sicuti & dolorem bonum,
Huiusmodi autem voluptatē falsam esse,
Sensus nobis à natura vtiliter esse tributos,
illorumquē appetitiones; verumtamen il-
lis intra modum esse indulgendum,
Postremum a Nobilio pro voluptate alla-
tum argumentum verissimū esse,
Hausta voluptate multas in nobis emerge-
re affectiones; in beatis autem mentibus
soli amoris relictum esse locum; qui amor
ad finem præsentem pertinet,
Quare exposita, finis disputationi imponi-
tur.

SVIVON ARAJ TE ARCV SE 273
FLAMINII NOBILII DE
VERA, ET FALSA VOLVPTATE



LIBER PRIMVS.



I NATV-
ra nostræ excel-
lentem præstan-
tiam satis cogni-
tam, atquæ perspe-
ctā haberemus,
vix fieri vnquā
posset, vt in vitæ
genere deligendo
erraremus, ac nō

semper optimam, laudatissimamquæ viuendi ratio-
nem sequeremur. Id multis quidem ex rebus vt lon-
gè non abieris, intelligi potest Quis ita sit aduersus
vocem veritatis agrestis, vt sinoscat intelligentia,
ac mente se Dijs Immortalibus esse persimilem, cæ-
terisquæ animantibus longè præstantiorem, idcirco-
quæ illam omni studio, ac dilligentia esse excolendā
addicat se totum opibus, ac diuitijs acquirendis? om-
nesquæ suas eò referat cogitationes? cum ille quidē

ad corporis potius cultum pertineant, & ad animæ illius custodiam, qua nutrimur, & crescimus, quæ infima, et vilissima animæ nostræ pars est, sint comparandæ? Quis propriam, germanam, maximam, maximèq; diuturnam animo percipi voluptatem, dum ex virtute agimus, atque in contemplatione versamur, sibi persuadens, voluptates illas, quæ sensu capiuntur, vehementius amplectetur? quæ sæpè doloris plenæ sunt; & semper bestiis etiam cōmunes? Nunc verò cum Endymionis quasi obdormientes somnum nos ipsos nunquā spectemus; & naturæ lumen à male consuetudinis corruptela, tanquā ignis interclusus extinguatur: mirandum non est, si maxima sequatur erratio in vita, consecuturūq; plerumque non modò ullam expressam, eminentemque effigiem, sed ne adumbratam quidem imaginem veritatis. Ex hoc somno, qui quidem morti simillimus est; sola Philosophia nos potest excitare, quæ nos ipsos nobis notos reddit, admonetq; continenter, quid natura nostra postulet, quid recuset; quo pacto vitia expellamus, & sensus rationi obedientes præbeamus; quo itinere perueniamus ad felicitatem. In qua diuina, cælestique scientia cum omnia, quæ traduntur, frugifera sunt, atq; fructuosa; tum nihil hominum vitæ utilius, quàm consideratio, atque cognitio voluptatis. Huius enim po-

tiunde cupiditas, cum nescitur ubi, aut qualis sit, omnium ferè malorum fons est, & origo. Quod si natura, & vis ipsius benè perciperetur; nullis fortasse stimulis ad virtutem, honestatemq; sequendam vehementius incitaremur, quàm desiderio voluptatibus. Nam quemadmodum dulcendo illa, qua sensus perfusi, ac deliniti mouentur minimè rarò homines de statu deiicit, planèquè efficit, ut non sint homines; sic voluptate illa, & gaudio, quo mens suis muneribus, officijsquè optimè functa afficitur, nihil fortasse optabilius, nihil diuinius excogitari potest. Accuratè autem quondam ab homine omnium sapientissimo, atq; doctissimo, totum hunc locum meminì esse explicatum, ac patefactam veritatè, cum antea non nihil esset dialecticè, ac probabiliter disputatum. Cuius sermonis memoriam, si dum eam viuā teneo, literis cōmendans custodire, atq; immortalè reddere conarer, non mediocrem me beneficium honestatis, ac sapientiæ studiosis allaturum existimauì. Id si erit, præclarè mecum putabo agi, & satis amplam mihi meorum laborū tribui mercedem. Nam cum de omnibus hominibus benè mereri pulchrum, atq; iucundum est, tum verò ex insigni aliquo ijs collato beneficio, qui tibi probati sint, quosquè singulari quodam amore prosequaris incredibile ad animum tuum affluere gaudium solet. Mihi au-

tem summo opere placere, probatosque esse eos, qui menti excolende se dedant, studiorum similitudo declarat, hæc verò quæ tradam, fore ipsis utilissima, si studium, atque aures adhibere non gravabuntur, summa illius, à quo accepi, sapientia fretus audeo affirmare.

Cum igitur Ferrariæ essem, ut Philosophie studiis operam darem, & Vincentium Madum Brixianum assidue audirem, maxima hominis doctrina, incredibiliq; scientiæ copia, ac varietate, eximia probitate, humanissimis moribus ita sum captus, ut tum denique vitam mihi iucundam putarem, cum illius hæcerem lateri, aliquidq; ex eo vel sermò, vel iocò dictum excipere liceret. Euenit autem Prid. Kal. Ian: cum ob natalem Domini nostri diem Gymnasia silerent, ut ego ad illum salutandi causa accedens, cum eo colloquentes reperirem Bartolomeum Riccium virum optimum, ac de bonis literis optime meritum, & Silium Antonianum, tum quidem primum ex pueris excedentem, sed ea indole, eaq; ingenij vi, ac gloria præditum, ut omnibus artibus, quibus ætas puerilis infici debet, egregie institutus, & iam scribere, quæ probarentur, posset, & magnum numerum optimorum versuum de maximis rebus ex tempore diceret. Tum post prima illa, quæ in congressu solemus, cū apud ignem omnes assedissemus,

Verè, atquè ex animo Siluio sum gratulatus, quem hesternæ die coram Ampliſſimis Cardinal: Hippolito Eſtensi, & Carolo Guisio Regis Gallorum ad Pontificem legato, & ſapientiſſimo Ferrarienſium Duce Hercule, regijſquè illius filijs, Alphonſo, & Aloisio de Pace, quod illi ab Hippolito propositum argumentum fuerat, eo modo dicentem audiueram, ut opinionem, quam maximam de eo conceperam, plane vinceret, atquè superaret. Tum Riccius qui Siluium & cõmendatione Herculis Ducis, & præclara Adoleſcentis indole adductus, filij loco amabat, propriamquè illius curam gerebat, manantibus propemodum præ gaudio lachrimis (nunquã enim teneriorem, atquè in amando ardentiorẽ hominem noui) hunc sermonem intulit. Natum sibi illum ad Musas, & Apollinem visum semper fuisse, nullamquè esse tam eximiam, atquè præclarã doctrinã, & eruditionis laudem, ad quã ipse peruenturus non esset, ingenio, & memoria omnibus hominibus, quos vnquã cognouiſſet, excellens, nactus præterea ex Herculis optimi, atquè omnibus rebus præcellentissimi principis liberalitate commoditates omnes, ut quieto, tranquilloquè animo literarum studijs dare operam posset: Pergeret modò, eandemquè viam non modò constanter, sed etiam alacriter insisteret; nec auocaretur voluptate, aut labore deterreretur.

Hoc enim, ut magnus vir dixit, omnia nos bona à Dijs Immortalibus quasi mercari, atque emere; voluptatem autem dulci illo, atque blando aspectu nos ad se se amplectendam allicientem, omnium postea malorum causam, & originem esse. Nihil aliud Cyrcis poculo, nihil Syrenum cantu significari. Hæc, inquit, amica sensibus, quod ex illis ortum ducit, gustui præsertim, atque tactui, illos etiam in homine regnare vult, atque ita vult, ut, nisi mentem, & intelligentiam tanquam verum, legitimumque regem, regno expulsam è medio sustulerit, atque extinxerit, nihil actum putet, & in eo vim omnem, potestatemque suam ostendat. Firmisimis rationibus summi philosophi probant, illustribus exemplis historia confirmat, natura ipsa non obscuris vocibus testatur, longissime à boni conditione abesse voluptatem. Rationes quidem si desiderentur; verissimæ, quæque nullo pacto refelli queant, ab Heroe illo nostro Platone sunt allatæ. Ipsius enim est hoc argumentum. Quod hominis bonum est, id ipsum omnino hominem bonum reddat oportet. At ubi se se animus cupiditate deinxit mala, voluptati que cōstringendum dedit, tantum abest, ut boni euadamus, ut omnia potius tunc facinora, omnia scelera se se proripiant, atque projiciant; quæ igitur bona, aut quæ potius non deterrima, atque exitiabilis censeretur voluptas

poteſt? Nam quemadmodum ignis omnium corpo-
rū putatur eſſe calidiſſimus, propterea quòd reliqua
ab ipſo concalcſcunt, ita voluptas, cum ab ea omnia
ferè mala proficiſcantur, maius reliquis, ut Archi-
tæ Tarentino placebat, ac pernicioſius malum meri-
tò ſtatuetur. Adde cuiuſq; naturæ proprium, &
peculiare bonum eſſe ab alijs omnibus ſeiunctum, ac
diſpertitum. Quare, ſi ferarum eſt voluptatem ar-
denti ſtudio perſequi, ut certe videmus eſſe, homi-
num conſilia alium finem, aliud, longèquè præſtan-
tius bonum ſpectare debebunt. Quòd ſi fortasſe bo-
no, quod nobis proprium ſit, caremus, et alienum eſt
adſciſcendum; curbelluarum: potius, quàm Deo-
rum immortalium nobis optemus bonum; qui-
bus mente, & intelligentia ſimiles, propèq; pares ſu-
mus? In Deorum quidem feliciſſimam, beatiſſi-
mamq; vitam voluptas tamen non cadit. Inepta
enim, planèquè ridicula Epicuri ratio eſt; qui cum
felices illos non iudicare minimè poſſet, nullamquè
ſine voluptate felicitatem, aut ſine corpore volupta-
tem eſſe opinaretur; ſi non corpus, & ſanguinem,
at certè quaſi corpus, & quaſi ſanguinem illis etià
aſſingere non eſt veritus. Alias aſſerrem aduerſus
voluptatem rationes (mirabiliter enim tuæ gloriæ
Silui faueo, cui hæc una officere poteſt) ſi tempus
poſceret, ac non ineptæ cuiuſdam loquacitatis crimè

consopitum. Grauiſſima, & ſapientiſſima T. Man-
 lii Torquati delatum ſibi Conſulatum ob valetudi-
 nem oculorum recusantis vox fuit, non recte ciuium
 capita, atq. fortunas ei committi, qui alienis oculis
 omnia gerere cogeretur. Eiuſdem principis Viri do-
 mus, & aures omnibus rumoribus, nuncijs, quere-
 lis, ſuorum præceptis, atque monitis dies, & noctes
 patere debent; quod à ſe præſtari princeps aliquan-
 do Senatus M. Tullius gloriabatur. Sed fortasſe
 Principatus iſte contemnetur à multis, qui Princi-
 pem tanquam adminiſtrum, ac potius ſeruum eo-
 rû, quos regit, putabunt eſſe, cum illis omnes cõparet,
 cõmoditates, ipſe omnium expers; priuatamque vi-
 tam multò feliciorem, magisq. expetendam exiſti-
 mabunt. Qua tamen in re longè animi falluntur.
 Nam quemadmodum genus hominum, quod reli-
 quis omnibus animãtibus præeſt, idcirco nobilitate,
 ac perfectione illis excellere meritò cenſetur; quemad-
 modum cœleſtes illæ, beatæque mentes, propterea
 quòd nos regunt, atque gubernant, longè melior e lo-
 co, atque conditione ſunt, quàm nos, qui regimur ita
 inter homines ipſos, eorum qui principatum, impe-
 riumq. obtinent, qui ad Reipub. gubernacula ſedent,
 modo ſeſe dignos eo dignitatis gradu præbeant, Sta-
 tus optimus, ratioq. vitæ maximè expetenda iudica-
 ri debet. Vel in apibus ipſis, tantulis animalibus,

intueri licet earum Regem quadam naturæ perfectione præstare cæteris. Ergo si *hominis* conditio optima est; ea autem voluptates omnes reijcit, & expellit, certè in voluptate bonum hominis consistere non potest. Accedit & illud, qui voluptatibus vehementer deditus sit, eum in multos per sepe dolores incurrere; à quibus eò magis opprimitur; quò mollius, ac delicatius viuere consueuerat. Nam si cui brutis animantibus, aut escam apponentes, aut fæminæ vocem imitantes insidias facimus; ita qui palato, ac libidini seruiunt, facile incidunt in fraudem; plurimisq; ac maximis periculis sunt expositi; per sepe etiã, postquã patria abligurierunt bona, atque omnes facultates dissipauerunt, ad inopiam reducti, & ab omnibus ludibrio habiti, miserrimam vitam degunt. Præclarus certè Imperator ille, qui clamabat, aut Cæsarem, aut frugi hominem esse oportere, egestate aliquandò se laborare sensit, ac doluit. Non rarò etiam, vel potius omninò semper, istiusmodi homines ita enervatum habent corpus, atque imbecillum, ut maximis doloribus, morbisque gravissimis crucientur; nec ad senectutem ferè perueniant; aut si perueniunt, plenissimam illam sentiant molestiarum. Quid? dum isti ad voluptatem ardenti, inflammatoq; studio feruntur, non ne longius semper eam vides recedere; propiusque muliercule

cuiusdam more ad eos accedere, qui non sequuntur,
 negligunt, contemnunt? Etenim isti, cum naturæ
 desiderio non expectato, sed recordatione tantū sua-
 uitatis, quā aliquandō perceperunt, incitati cibum,
 ac potum sumunt; vix ullam præ ijs capiunt vo-
 luptatem; quī fame, ac siti, tanquā suauissimo,
 utire uera est, condimento vtuntur. Quapropter
 illos omnium rerum satietas, ac fastidium ita ca-
 pit, ut hinc varia, preciosaq; vina, illhinc niuem,
 aliunde salsamenta, summo labore, quē tamen æquē
 ac mortem fugiebant, conquirere cogantur. Proinde
 non iniuria gloriabatur Agesilaus, Persarum qui-
 dem Regi, quamuis magnus appellaretur, molitie
 interim, ac luxu planè perduto, si vellet absquē dolo-
 re viuere, è terræ finibus esse voluptatis illecebras pe-
 tendas, & accersendas; se verò, quòd laboris pa-
 tiens esset, quòd famem, sitimq; expectaret, in me-
 dijs versari voluptatibus: suauissimū sibi omnē cibū,
 ac potū esse: placatissimā à somno quietē afferri: nun-
 quā esse Deos immortales accusandos, quòd aliquā-
 dō maximos calores, aliquādo maxima frigora sen-
 tiremus. Posse enim se vtrūq; facillimè perferre.
 Verè etiā apud Luciliū verè sapiens Lelius dicebat.
 „ O Publi, ò gurgēs, Galloni es homo miser, inquit,
 „ Cenasti in vita nunquā bene, quū omnia in ista
 „ Consumis, squilla, atq; acipensere cum decumano.

Quantum autem maioris afferre arbitramur, vel maximis undiq; voluptatibus ad nos affluentibus, illabentibusque conscientiam segniter, ac socorditer actæ vitæ? Quantam esse vim pœnitendi? Præclare Demosthenes, cum Laidis oraret noctem, illaque magnam admodum peteret mercedem, ad se rediens non, inquit, tanti emo pœnitere. Quid multa? sume voluptatem, quam maximam iudices in rebus humanis; eam non simplicem, atque sinceram, sed perpetuò dolori annexam reperies. Quid autem iucundius, ut est in Epigrammate Deliacò, quam re amata potiri? Quàm verè tamen status, atque conditio vitæ huiusmodi à suavisimo, doctissimoque Poeta planè misera appellatur?

- „ Etenim potiundi tempore in ipso
 - „ Fluctuat in certis erroribus ardor amantium;
 - „ Nec cōstat, quid primū oculis, manibusq; fruatur:
 - „ Quod petiere, premunt, arctè, faciuntq; dolorem
 - „ Corporis; & dentes illidunt sæpe labellis;
 - „ Osculaq; affigunt, quia non est pura voluptas;
 - „ Et stimuli subsunt, qui instigant ledere id ipsum
 - „ Quodcunq; est, rabies inde illi germinat vrgens.
- Quàm verò præclara sunt, quæ paucis interieclis sequuntur? Libet enim tentare, an versus illos memoria teneam; & si procedet, benè quidem erit; sin minus; etati, quæ, ut videtis, septuagenaria est, vitio vertetis.

- „ Adde quod absumunt vires, pereuntq̃ labore.
 „ Adde quod alterius sub nutu degitur ætas,
 „ Labitur interea res, & vadimonia fiunt.
 „ Languent officia, atq̃ egrotat fama vacillans.
 „ Unguenta, & pulchra in pedibus sicyonia vident.
 „ Scilicet, & grandes viridi cum luce smaragdi
 „ Auro includuntur, teriturq̃, thalassina vestis.
 „ Assidue, & Veneris sudorem exercita potat;
 „ Et bene parta patrum fiunt anademata mitræ.
 „ Interdum in pallam, et qualos, et iacchia vertit.
 „ Eximia veste, & victu, conuiuia, ludi,
 „ Pocula crebra, vnguenta, coronæ,serta parantur
 „ Ne quicquam: quoniam medio de fonte leporum
 „ Surgit amari aliquid, quod in ipsis floribus angat
 „ Aut cum conscius ipse animus se forte remordet,
 „ Desidio se agere ætatem, lustrisq̃ perire,
 „ Aut quod in ambiguo verbum iaculata reliquit,
 „ Quod cupido affixum cordi viuescit, et ignis,
 „ Aut nimium iactare oculos, alium de tueri
 „ Quod putat, in vultuq̃ videt vestigia risus.
 „ Atq̃ in amore mala hæc proprio, summèq̃ secundo
 „ Inueniuntur; in aduerso verò, atq̃ inopi sunt,
 „ Prendere quæ possis oculorum lumine aperto,
 „ Innumerabilia.

Ergo voluptates illæ, quas omnium maximas vul-
 gus iudicat, antequàm capiantur, insatiabili nos tor

quēnt cupiditate; ex quo animum illis emācipatum
 Vasi perforato similem dicunt esse Architas, &
 Plato; dum capiuntur, nullam afferunt quietem,
 nullam tranquillitatem, quod boni maximè pro-
 prium est, sed ita potius nos commouent, atq; pertur-
 bant, ita de statu deijciunt, ut quemadmodum di-
 uinus Vir Democritus dicere solebat, morbo illo te-
 terrimo, quem comitialelem vocant, correpti videamur;
 paulo post innumerabiles, atq; ingentes mole-
 stias pariunt. Tot igitur, ac tantis rationibus conui-
 ctam voluptatem, tanquam hominum pestem quasi
 exilio mulctemus, & à nobis omninò quam longif-
 sime repellamus. Nec verò abundant quidem ra-
 tiones, desunt autem exempla, quibus eadem causa
 confirmetur. Nam præter illa, quæ, ut rationes con-
 firmaremus, attulimus, adhuc innumerabilia asser-
 ri possunt. Quis enī plurima, maximaq; hominibus
 à voluptate illata detrimenta non nouit? Quid An-
 tonij, Quid Anibalis omnem dignitatem, quam
 erant amplissimam consequuti, conuellit? Voluptas.
 Quid Perarum opulentissimum, ac potentissimum
 Regnum funtius euerit? Voluptas. Nam si illi
 traditam à Cyro Maiore disciplinam seueritatis,
 laborisque plenam retinuissent, aut ipsos aggredi
 non esset ausus Alexander; aut certe pretium ob-
 temeritatem tulisset. Quid verò, ut alia nunc ve-

tera exempla omittam, Populi Romani Imperium, Custodiam gentium, Humani generis lumen, atque ornamentum perdidit, atque deleuit, nisi illa eadem voluptas? Obscœna, inquam, & monstruosa mollitudini tantum, atque libidini indulgentium Caesarum deleuerunt. Quapropter Verissimè à poeta Valde bono dictum fuit.

„ Otium Catulle tibi molestum est;

„ Otio exultas, nimiumq; gestis:

„ Otium, & reges prius, & beatas
perdidit Vrbes.

Quòd si recentia exempla, quòd nobis propinquiora quoddamodò sint, magis nos afficiunt, comouentq; Cosmus, & Laurentius ex Medicea Familia patrum nostrorum memoria, cum à Reipub. cura, & procuratione nullum Vnquã aut comòdum, aut otium eos abstraheret, nò voluptas abduceret, non labor auocaret, non retardaret somnus, habitu, incessu, sermone priuatorum ciuium specie præferentes, sine Vlla tamen controuersia principem locum in Florentina ciuitate ita tenebant, ut ex illorum consilio, atque voluntate Vniuersa Respub. penderet. Petrus Verò Laurentij Filius nullo insigni vitio, multis etiam virtutibus præditus, & Aui, & Patris recordatione imprimis commendatus, tamen cum raro consilijs, ac negotijs publicis interesset,

atq̃ amoribus semper vacaret, se se idoneum prae-
buit, quem aduersarij non modò Principatu, sed etiã
Patria priuare, & sperarent, & possent. Hunc nò
imitatus Cosmus, qui nunc Florentinis imperat, sed
ceteros potius, quos recensui ex Medicea familia,
mentem semper, tanquàm arcum, intentam habet,
contemptisq̃ omnibus voluptatibus ita Reipub. dat
operam, vt nullam ferè suarum cogitationum par-
tem aliò deriuat. Itaque tempestates omnes quasi
è specula quadam prospiciens, eas à se, atque populis
suis arcet, ac propulsat: resque semper ex sententia
fluunt: vt iam splendore nominis sui compleat, atq̃
illustret orbem terrarum. Ecquid verò cause puta-
mus esse, cur in tot bellorum incendijs in hac tamen
Ducis nostri ditione omnia pacata, tranquilla, secu-
ritatisq̃ plena sint, nisi ipsius vigilantiam, quam vi-
demus, et admiramur? Habet autē, quē sequatur,
Alphonsum Patrē suum, industriæ, diligentie, tole-
rantie exemplum: cuius non modò nomen, sed etiã
laudes iam refert Alphonsus meus, et altissimo quo-
dam animo à natura præditus, & domesticis exem-
plis incensus, & non nihil fortasse meis monitis, atq̃
præceptis confirmatus: de quo, vt principia se se
dant, augurari libet, gloriam, ac decus nostræ etatis
fore. Sed exemplorum aut hoc satis est, aut quem-
admodum de testibus index ille dicere solitus erat,
nesciò

nescio quid satis sit. Age verò nonne perspicua sunt iudicia naturæ? Videmus pueros, in qua potissimū ætate nondum à consuetudine deprauata naturalis instinctus, atque propensio elucere potest, præsertim si excelsiore animo sint affecti, si ad aliquam præclaram artem se contulerint, ita incitare, atque inflammare studium suum, ut nihil fieri possit ardentius, ita porro labores omnes, æstus, frigus, famē, sitim patienter ferre, ac pro nihilo putare, ut sensus propemodum carere videantur. Nonne aliud quiddam intelligis spectare hominis naturam, quam voluptatem? Quid? qui in aliqua libidine se vult effundere, ut voluptatem capiat; etiam si nullam pœnā extimescat, tamen ne deprehendatur, diligenter curat, veretur hominum reprehensionē, diurni ipsius luminis aspectum reformidat. Quid hoc est? Homo, qui à veteribus Græcis ~~φως~~ est appellatus, quod tenebras odio prosequatur, lucis sit amicissimus: cuius animus Summi Philosophi nihil aliud putarunt esse, quam lucem quandam, propterea quod adueniente nocte mirabiliter perturbetur, ac ledatur, & quasi ignis cinere, ita ipse somno obruatur, & sepeliatur: illucescente autem die letetur, & quasi renasci sibi videatur, alacerque suis fungatur muneribus, cui etiam animo rectè, & ex virtute agentis post discessum à corpore, plenissima lucis loca, vitijs au-

tem inquinato, ut ait poeta nescio quis.
 „ Acherontia templa, alta orci, pallida
 „ Lethi, obnubila, obsita tenebris loca.
 Uniuersa antiquitas assignauit, ita igitur, inquam,
 à natura factus, & institutus homo, in voluptati-
 bus tamen capiendis lucem fugit, tenebris libenter se
 committit. Non ne igitur vides nostræ naturæ ad
 uersari maxime voluptatem? Multa adduci pos-
 sunt; sed nos hoc uno præterea contenti sumus. Mi-
 rum est, quamuis nos prauis infecti opinionibus, vi-
 tiosoque more deprauati, simus ipsi appetentissimi,
 ac studiosissimi voluptatis, quam seuerè tamen in
 alijs id reprehendamus, quantoq; in illos odio incen-
 damur, qui voluptariam, delicatamq; viuendi ratio-
 nem delegerunt. Docuit enim nos non Aristoteles,
 non Plato, sed multò melior magistra natura ipsa;
 neq; hanc à matre, aut nutrice opinionè accepimus,
 sed ab illo præstantissime, ac sapientissime mentis
 nomine, quo vniversus orbis regitur, animo nostro
 insitam, in hanc venientes vitam nobiscum gessi-
 mus, colendam esse omnibus officijs humanam so-
 cietatem. Atqui voluptatem tanquàm filiolum am-
 plexantur, & osculantur suam; qui illi vni operam
 dant, atq; inserviunt; y profecto aliorum studere cō-
 modis, atq; in cōmune consulere, nullo pacto queunt;
 proindeque iustissimum in se concitant cunctorum

hominum odium. Quàm verò publicum hoc, & commune odium perniciosum, ac funestum sit, multorum docuit euentus. Ergo si multis, ijsq; firmissimis rationibus, si perspicuis, illustribusq; exemplis, si grauissimo naturæ testimonio rem iudicatam vides; cum voluptate perpetuum tibi bellum suscipiendum, atq; immortales exercendas esse inimicitias, omnemq; animi mollietiem eijciendam mihi Silui putato; amplectendum autem laborem; quem, ut initio etiam dicebamus, tanquã bonorum mercedem, quæ nobis tot, tantaq; tribuunt, à nobis exigunt Dii Immortales. Etenim si hominum beneuolentiam plurimi facis, ut facienda certè est, illorum commodis summa diligentia, summisq; persæpe laboribus tibi erit seruiendum; si Veneta Ciuitate donari cupis, qui honos hoc tempore amplissimus censetur, præclaram illi operam vel pace, vel bello naues necesse est; Si Romæ maiorem aliquem magistratum vis consequi, pro Ecclesia Dei tuenda, atq; amplificanda, omne studium, sedulitas, fides est adhibenda, nulliq; non alacriter adeundi labores. An non vides illos qui diuitijs, opibusquè excellere summū bonum putant, idq; sibi tanquã finem atquè extremum proponunt, longinquas regiones obire pedibus, durissima hinc me trāsmittere maria, calorē, atq; frigus ita cōtemnere, ut ex ferro, atq; marmore facti esse uideantur?

Quapropter, quod ille à Ioue ortus suis praecepit filijs, vigilandum est semper, hoc nobis, ut ad laborem, atq; decus excitemur, praeceptum esse existimare debemus. Non est iucundum Imperatori media hieme sub dio pernoctare, aestate loricatum in hostes vel ipso meridie irrumpere; cum urget periculum, totis noctibus somnū oculis non videre suis, incommecat inopia herbis, & radicibus, ut è terra nascuntur, vesci, atque etiam, si opus sit, in ediam diutius ferre. Non enim quia illi cor sapit, idcirco ut inquit ille, non sapit palatū. Verū hęc omnia spe victorię compensat, ac propterea libentissimè tolerat. Hercules quidem non modò Iouis filius, sed illius etiam amor, atq; delicię, cum de omnibus gentibus optimè mereri studeret, cum opem indigentibus, atq; salutem ferret, cum nihil aliud, quàm laudem, gloriam, immortalitatem sibi proponeret, tot, tantosque labores sustinuit, atq; adeo exantlauit, ut illos quidem tristi admodum nomine ærumnas veteres appellarint. Hęc igitur una laboris via, hoc uno vigilantie, atq; assiduitatis itinere ad laudem, ac decus peruenitur. Nec verò parui refert, à primis temporibus ætatis hunc esse cursum institutum, In ore omnium sunt carmina illa Horatiana.

„ Fingit equum tenera docilem ceruice Magister

„ Ire viam, quā monstrat eques: Venaticus ex quo
 „ Tempore ceruinam pellem latrauit in aula;
 „ Militat in Siluis Catulus: nunc adhibe puro
 „ Pectore verba Puer: nunc te melioribus offer.
 „ Quo semel est imbuta recens, seruabit odorem
 „ Testa diu.

Combibuntur enim omninò teneriore animò artes, atquè disciplinae, & altius quodammodo imprimuntur. Quapropter Græci educationem, institutionem, ac disciplinam παιδείαν vocant, quòd in puerili præsertim ætate adhibita plurimum proficiat: magniq; tunc ad virtutem progressus fiant. Sed ego planè ineptus sum, qui te Silui ad studium laudis cohorter freno potius, quàm calcaribus egentem, & coram grauißimo, ac maximo omnium philosopho de voluptatis natura tam multa dicam. Aura scilicet amoris, quo te prosequor, longius me prouexit, quàm par erat, & vitio ætatis vtor, quæ loquacitatis est amica. Sed quando vitium naturale est, à vobis certè ignosci debebit.

Ego verò, inquit Madius, præclarissimas doctissimorum hominum sententias quasi vnum in locum conductas, & summa quadam castitate, atq; elegantia sermonis tractatas audiens mirabiliter sum delectatus. Spero etiam cohortatione tua Siluium confirmatum in curriculo virtutis, atq; laudis constantius permansurum. Sed quid tu Flamini ad

hæc? Ex ore enim, & oculis tuis Videor mihi intelligere nonnihil resedisse in animo tuo; quod tibi pariat dubitationem. Nihil mirum, inquam, si probe nosti animum meum, qui tecum amore, atque admiratione tui captus assidue versatur. Sed certe dicente Riccio, quamquam eloquentiam maximam cum doctrina coniunctam admirabar, tacitusque mecum ipse laudabam, eum tamen ex animo meo ejci scrupulum non sentiebam, qui diu male me habuisset. Sæpe enim multumque dubitavi, cur voluptas in tam graves gravissimorum hominum reprehensiones incurrisset; cum illa quidem mihi beatæ vitæ effectrix in primis videatur. Cuius sententiæ meæ, quando in hunc sermonem incidimus, libenter causas, rationesque afferrem (vehementer enim auro scire, quid tu de illis optime præceptor sentias) nisi pertimescerem; ne vobis molestus essem. Istud periculū ego, inquit Madi, præstabo. Quid enim hoc tempore agamus potius, non habemus, & res meherclè digna est, de qua disputetur; nec ut arbitror, ista de voluptate tractatio carebit voluptate. Hic Riccius leniter arri-dens, metuo, inquit, ab ista oratione. Facile enim ad aures Silij gravior accidet, quam mea, fortasseque nonnihil de illius diligentia, atque studio detrahet. Quapropter istud quoque periculum tibi Madi, quan-

do tu Flaminio potestatem dicendi satis, est propul-
sandum. Verò, ac libenter, inquit ille, hasq; mihi
suscipio partes, ut si quid à Flaminio non satis ve-
re dicetur, neque satis ad Siluij rationes accommo-
date, ego errorem, fontemque erroris ostendam, Sil-
uiumque decipi nullo pacto sinam. Quanquam
vides Ricci eum, qui voluptatem est laudaturus,
ab omnibus voluptatibus, quarum precipue affinis
est ipsius etas, ut virtutem sequatur, ac decus, ab-
horre. Tum Siluius, ò vere candido mihi lapillo
signandum diem, cum mea causa tam præclara
disputatio est instituta. Et mihi etiam, inquam,
pulcherrime hic dies illuxit, qui locum hunc à Ma-
dio illustrari summopere cupiebam. Proinde, &
si Riccius non optime de me videtur sensisse, ex-
stimauit enim, quantum ex ipsius verbis intelli-
gere potui, me ambitione potius, quam discendi
cupiditate ductum, contra se dicturum, facile ta-
men hanc illi iniuriam remitto, atque ignosco, qui
rem tandiu exoptatam mihi à Madio impetra-
uit. Utinam, inquit Madius, opinio, quam de
me concepisti, ne te fallat, ac sustinere possim
expectationem. Nulla enim ferè res est tam per-
spicua, atque illustris, cuius uis, & natura in
obscurò, ut inquit ille, non lateat; & ego homo
sum; id est, qui facile decipi, ac falli possim.

Sed experiar tamē, ut rectissimo, atq; honestissimo tuo desiderio morem geram. Hoc loco, cum omnes ad audiendum se se ostenderent paratos, ego sic sum exorsus.

Felicitas summum, præstantissimumq; hominis bonum est, sicuti extremum omnium malorum miseria: quocirca ad illam omni studio ferimur hanc quantum possumus evitamus. Felicitatis autem notioni, quam in animo insitam habemus, ita mihi coniuncta esse voluptas videtur: ut neq; etiam Deorum immortalium vita, nisi maximis voluptatibus confertissimam mente concipiamus, satis felix, ac beata intelligi à nobis possit. Quapropter veteres poetæ, quos, quò propius à mundi origine aberant, eo sapientiores fuisse credibile est, tametsi in Deos, qui corporis sunt expertes, nec cibi, nec potus, nec obscenarum voluptatum desiderium cadere probe scirēt, totos tamen dies in opipare paratis conuiujs consumentes, nectareq; & ambrosia se se oblectantes, & amorì palam seruientes inducunt, ut intelligeremus felicissimam esse eorum vitam, & voluptatibus affluentem. Ergo si Deorum immortalium vita usquequaq; felix, atque beata statui debet, ut certè debet: illa autem sine infinitis prope modum, atque immensis voluptatibus ne fingi quidem potest, profectò non est cunctandum profiteri humane etiam felicitati

felicitati coniunctissimam, idcircoq; summum quoddam bonum, ac summopere expetendum esse voluntatem. Cui rei illud etiam argumento esse potest, quod cum ceteræ res omnes ob aliud quippiam expetantur, ut diuitiæ ob vitæ commoda, virtutes, ut feliciter viuamus felicitatem duntaxat, atque voluptatem per se ipsas appetimus, atq; complectimur. Ineptus enim, ac planè ridiculus videatur, qui causam querat, cur felicitatem, aut voluptatem sequamur. Quā obrem utramq; Eudoxus honore potius, quā laudibus dignā censebat. Laudantur enī virtutes, ut illarum pulchritudine, atq; splendore capti ad ipsas colendas incitemur; ac ad felicitatē, et voluptatem adamandam, ac prosequendam nihil cohortatione, nihil incitamento est opus. Per nos ipsi ad illas mirabiliter propendimus. Proinde utraq; honorari, non laudari debet: quemadmodum etiam Deos immortales non laudamus, sed honoramus, et colimus. Accedam propius. Contrariorū contraria solent esse consequentia; ut si iniustitia vitium est, malum fugiendum; iustitia certè virtus, bonum, atque expetendum poni debet. Id in rem propositam commodè transferri potest. Nam si dolor omnis malus, ac fugiendus est, quid cause sit, cur non continuò voluptas bona, atq; optabilis statuatur, non video. Dolor quidem huiusmodi malum

est, ut illi etiam philosophi, qui dolorem in malis connumerare verebantur, paulo tamen significantioribus verbis naturæ inimicum, reiiciendum, fugiendum dicere non dubitarint. Non enim si à dolore vocabulum illud mali auferre poterant, ut ab Academicis dissentire viderentur, propterea etiam id, quod illa voce significatur, poterant auferre. Sed quid multa de dolore asserere opus est; cum à labore etiam, qui multò leuius quiddam est, quàm dolor, simus omnes natura abhorrentes, ac maxime propensi ad voluptatem? Declararunt id Græci eodè persèpè vocabulo dolorem, laboremq̃, quasi duas res simillimas, atq̃ inter se maxime coniunctas comprehendentes; & Latini etiam, ut Riccius modò dicebat, labores aliquādò ærumnas appellant; quo vel ipso nomine compellimur in fugam. Vocat Homerus laborem δουλοπλοον, quasi non modò corporis, sed etiam animi corruptelam, ac pestem; negatquè apud eundem Mercurius, què tamen Deum aduoluisse, laboriosèq̃ vitæ præesse veteres voluerunt, se nisi præpotentis Patris imperio parendum fuisset, ad Calypsus insulam fuisse accessurum, nullam aliam ob causam, nisi propterea quòd multū maris esset transmittendum, nullaq̃, propinqua esset ciuitas, quæ Dijs sacrificia faceret, atq̃ hostias immolaret. Noster autem Homerus & improbū laborem dixit, & vna

cum luctu, morbis, senectute, metu, fame, egestate, letho, quæ perspicue non mediocria mala sunt, in primis Orci faucibus collocavit, alibiq; etiam, ut sententiam suam nobis testatiorem relinqueret, tanquam bonis rebus contrarium posuit.

„ Optima quæq; dies miseris mortalibus .cui

„ Prima fugit : subeunt morbi, tristisq; senectus.

„ Et labor : & dura rapit in clementia mortis.

Ac sanè cum Saturno regnante aurea illa toties decantata secula erant, & natura cum primis congruenter vivebatur, ne nomen quidem laboris notum fuisse crediderim.

„ In medium querebant, ipsaque tellus

„ Omnia liberius nullo poscente ferebat,

„ Ipse mella dabant quercus, ultroq; ferebant

„ Obuia securis vbera lactis oves.

Notis clarorum poetarum carmina. Ergo si cum maxime ex natura lege ætas agebatur, longissime omnis labor aberat: certe laborem nostre nature esse adversarium possumus confiteri. Atqui res ita se habet, ut nemo sit ita vel stultus, vel sui ipsius negligens, qui se laborare dicat, ut laboret. Aliud quiddam sæpe spectamus, aliud volumus, aliudq; omnino finem consequistudemus. Fuit hæc laudatissimi illius Cyri Maioris sententia à voluptatibus non aliam ob causam esse abstinendum, capiendosque labores: quam ut maioribus,

ac diuturnioribus fruamur voluptatibus. Quocirca laborem iucundæ vitæ ducem appellabat; ab illo enim & cibum, & potum, & somnum iucundissimum reddi. Hinc Hesiodus, cum virtutis viam asperam, difficilem, laboriosam poneret, ei tamen, qui ad summum pervenisset, plana omnia, leta, ac voluptatis plenissima apparere affirmavit. Pyrrus certe præclari nominis Rex Cyneæ interroganti, quid tot laboribus, atque expeditionibus suscipiendis quereretur, respondit adeptum se ea quæ concupierat, iucundissimam, maximeque hilarem acturum vitæ. Atqui hoc loco Riccij oratio, pace ipsius dixerim, herere mihi nonnihil, atque fluctuare videbatur. Nam cum multis argumentis, adhibitis etiam locupletibus testibus, probaret, eum, qui laboribus deditus esset, iucundius illo vivere, qui nihil aliud, quam voluptatem sequeretur; non videbat se ad voluptatem quidem cohortari Silvium, idem enim, nisi fallor, est iucundè, atque cum voluptate vivere: sed interrim artem quandam illius percipiendæ constituere; ut quemadmodum Lysias auctore Platone, cum maxime amaret, facilius tamen quod cupiebat, assequi posse sperabat, si non amantis speciem præ se tulisset: ita qui appetens, atque studiosus voluptatis est, si illius amorem dissimulet, ad eius possessionem facilius, atque expeditius sit perventurus. Quod si non modò

dolor omnis, hoc enim satis clarum, atq; perspicuum est, sed etiam labor, nisi voluptatem pariat, per se, suaq; natura est fugiendus, atq; à nobis amouendus, contrarij autem, sicuti dicebamus, contraria conueniunt, cōsuetudinarium profecto est voluptatem omnem suauis, atq; natura summopere esse expetendam, atq; amplectendam. Verum intrabo etiam magis. Sensum nobis à natura datum esse nemo est, qui dubitet, & voluptatem esse amicissimam sensui satis etiam est exploratum. Quam obrem naturæ nostræ conuenientem, atq; consentaneam esse fateamur oportet. At enim dices, menti, & intelligentiæ, quæ humanæ naturæ principatum debet, obtinere, repugnat, atq; inimica est, quamuis amica sensibus. De isto mox videro. Nunc illud teneatur, nisi effectorem illum omnium rerum, & conditorem, aut imprudentiæ, aut improbitatis crimine accusare velimus, quod à cogitationibus nostris longissimè abesse debet, vtiliter nobis sensum esse tributum, non noxam inferre, ac detrimentum. Id hac re intelligi potest, quod mens ipsa, ratioq; sensibus vitur tãquã ducibus ad veri inuestigationem, & inuentionem, illisq; orbatà vix, aut ne vix quidem vllam assequi scientiam potest. Quam obrem si sensuum perceptio, atq; cognitio tantum abest, vt nobis officiat, vt mirificas potius, & ingentes afferat utilitates; neq;

eorundem certè appetitio, propensioq; obesse debet :
 At perspicuè voluptatem appetunt, atq; in eam toti
 propendent. Voluptas igitur mala, ac nostræ natu-
 ræ repugnans, & inimica esse qui potest? Nec ve-
 rò desunt gravissimi viri, qui in Hercule, atquè Eu-
 ristheo nostræ vitæ expressam esse conditionem pu-
 tent; ut quæadmodum Hercules quâvis Iovis filius,
 & virtute, animiq; magnitudine supra humanas
 etiam vires excellens, cæloquè iam pridem destina-
 tus, ignavissimo tamen, atq; inertissimo omnium ho-
 minum homini Euristheo, dum in terris ageret, ser-
 uire coactus fuit, sic animus noster, quamvis longè
 nobiliore, ac præstantiore natura constet, quàm cæ-
 tera omnia, quæ in hac inferiore mundi parte conti-
 nentur, ac cælestium, beatarumq; mentium loco, ac
 numero ferè censeatur, dum tamen versatur in hoc
 corpore, ipsius imperium subire, ipsius servituti commo-
 dis cogatur. Id si est, ut multis fortasse verisimile
 videbitur, profectò vici. Nam si voluptas corpori,
 sensibusque maiorem in modum placet; & his tan-
 quàm dominis in hac vita animus parere debet;
 certe etiam ut multe semper voluptates præsto sint,
 & undiq; affluant, operam dare debebit. Quod no-
 bis, si Principum vitam, moresquè intueamur, mi-
 rum ni credibile videatur. Tiberius Cæsar magi-
 stratum instituit, qui novas continenter inveniendi

Voluptates curam gereret, Xerxes Persarum Rex incognitum afferenti voluptatis genus amplissima præmia edicto statuit. Ex quo satis mirari nequeo Riccium ea ratione nos à voluptate auocatum iri existimasse, quòd in Principum virorum vita, quam tamen imitari deberemus, nihil illi esset relictum loci: cum potius nullam aliam ob causam beatissimos eos iudicemus, quàm quòd plurimas, maximasquè quandolibet, possunt capere voluptates. Sed, ut voluptas illa, qua sensus perfunduntur, ac demulcentur, noxia homini sit, ac perniciosa, iustisquè de causis malè audiat, non enim vehementius repugno, at aliam reperiri, quæ mentis, atquè intelligentiæ propria sit, idcircoquè laudabilis, honesta, summo studio complectenda, quis satis verè negare potest? Vulgatum illud prouerbium est, tùm demum in artibus, atquè disciplinis magnos progressus fieri, cum voluptas quædam actionum, comes accesserit. Cyrus Maior, quem iam sæpius admiratione quadam commoti laudauimus, leues esse Imperatori labores dicebat, cum voluptate illa, quæ de honoribus, gloriaquè manat, compensarentur. Duillus, qui primus Carthaginenses classe deuicit, è conuiuio tibijs præcinentibus domum redire solitus erat, ut lætitiâ illam, quam animo ex prospero euentu caperat, significaret.

Magni verò sunt eorum labores, qui in magna aliqua, & præclara disciplina excellere sibi in animum induxerunt: quis dubitat? Attamen facile perferuntur, cum multò maxima voluptas, quæ contemplando, atque intelligendo percipitur, assidue còmes adsit. Habent in ore philosophi tum Socratem, & Chrisippum, qui studijs suis intenti tanta voluptate perfundebantur, ut corpore euolasse viderentur, tum Solonem, qui extremum spiritum duceus, extinctisque iam propemodum aduentante morte sensibus tantum aberat, ut voluptatis huius gustum amisisset, ut potius tunc quoque nullo alio se; quàm discendi desiderio teneri, morientibus, sed ætempiternæ memoriæ cominedandis vocibus indicaret. Tum verò nihil afferunt admirabilius, quàm Archimedis factum, qui defixus in studijs suis nò patriæ casum, ac ruinam sensit, nò ciuium gemitus, non hostium exprobrantium superbas voces audiuit, non gladiatorum, quibus & ipse confossus est, fulgorem aspexit. Nos autem præstantissimæ huius voluptatis testes Heroas nostros citare possumus, quorum immensa quedam vis voluptatis, quam ex Dei contemplatione, atque amore hauriebant, maximos, ac planè intolerabiles cruciatus imperceptos transire faciebat. Vel proximè Stephani proto martiris memoriam colimus, quem dubitandum

non est quin iucundissimus ille præpotentis Dei filij aspectus, qui globis cælestibus diductis illi se intuentum dederat, ab omnibus iniurijs, quæ à Iudeorum crudelitate proficisci poterant, et ab illo acerbissimo sensu mortis vindicaret. Verum res amplior, quàm hoc angusto sermone concludi possit. Nequè verò existimarim ego pueros, cū cibi, potus, somni nullam sentiunt cupiditatem, modò ludis, atq. spectaculis inter sint, voluptatem cōtemnere, sed potius illam, quæ in cognoscendo consistit, ad quā cuncti natura ferimur, ac rapimur, cæteris omnibus voluptatibus anteferre. Memini Adolescentem quendam nostratem bonis omnibus, quæ aut Fortuna, aut Natura hominibus largiri potest, ornatissimum; cum à mercatura, cui operam nauare cæperat, bono quodam nostræ ciuitatis fato ad literarum studia, et ut suis morem gereret, se contulisset principio, quod nō dum voluptatem illam gustaret, quæ ex huiusmodi studijs hauritur, vix animum ad ea applicare potuisset; paulo post cum gustare cepisset, eam operam curam, diligentiam, in ijs ponere solitum fuisse (quam etiam cum ætate simul accreuisse audio) ut iam omnia summa de illo sperem. Quapropter quod ab ingenioso poeta de improbis, sceleratisq. hominibus dictum fuit, satis illos facinorum suorum pœnas persoluturos, si virtutis speciem, ac pulchritudinem

Vnquam conspexissent, quod quàm excellentis, di-
 uiniquè boni possessionem sibi ipsi inuidissent, tùm
 deniquè intellecturi essent: idem mihi de indoctis,
 literarumquè expertibus dicendum videtur, si volu-
 ptatem illam, quæ ex multarum, & præstantissi-
 marum rerum cognitione hauritur, semel animo pos-
 sent intueri, ipsosmet vitam suam quantumvis re-
 liquis commodis, ac voluptatibus circumfluentem,
 planè infelicem, miseramquè esse indicaturos. Ergo
 si felicitas, quæ summum hominis bonum est, sine
 voluptatis societate, atquè coniunctione intelligi non
 potest, si dolor omnis, & mehercle etiam labor per
 se, suaptequè natura est fugiendus, si voluptas sensui
 placet, atquè amica est, sensus autem nobis est à na-
 tura utiliter tributus, si aliqua postremò existit vo-
 luptas germana, maximèquè propria rationis, &
 mentis, cur voluptatē in bonis numerare veremur,
 cur non expetendam, complectendamq. statuimus?
 cur tot illam obiurgantium philosophorum voces au-
 diuntur? Hic cum finem dicendi fecissem; priores,
 inquit Siluius, rationes tuæ, licet ego illarum vitium
 non deprehenderem, modum duntaxat, speciemquè
 necessariæ argumentationis habere mihi videban-
 tur, re vera autem huiusmodi esse, quæ refelli pos-
 sent: at postrema & verissima visa est, & me
 in eodem curriculo retinuit: atquè in pristina vi-

acendi ratione mirifice confirmavit. Tum Madius Maecte, inquit: Quemadmodum enim corporis nostri vis, & facultas illa, quam Medici naturalem vocant, postquam cibum sumpsimus, eam partem sibi seponit, atq; custodit, quæ naturæ nostræ conveniens, consentaneaq; est, noxia autem repellit, ita nunc te video Silui ex multis, & satis quidem acute conclusis rationibus, quas Flaminius attulit, admirabili quadam naturæ bonitate, eam duntaxat, quæ veritatis, ut dixisti, & utilitatis, vel salutis potius plenissima est, in animum admittere, ac probare, cæteris quæ aliquod vitium continebant, non assentire. Quare cum Flaminij oratio, quod Riccius metuebat, tibi non modo non obfuit, sed etiam profuit, nihil amplius causæ est, cur ego de hac re verba faciam. Tum ego animo maxime perculsus, potes, inquā, si vis, me in summā expectationem adductum deferere: sed si benè novi humanitatem tuā, non facies: quāquā non tam mehercle humanitas, quā etiā probitas, ac iustitia tua agitur, cū promissis non stare iniusti planè hominis sit. Hac, inquit ille, conditione pollicitus eram, si sermo tuus Silui non cuisset. Nunc & tu dicendo profuisti, & ego aliās hanc rem totam tibi patefacere potero. Multa enim te desiderare nō ignoro, quæ si nunc à me afferantur, parvā omninō rationē habuisse Siluij videar.

Et si enim in illa omnia summa adsint, abest tamen maturitas ætatis, quam flagitant ea, quæ ut non modo tibi, sed etiam Riccij præsentis singulari eruditioni satisfacere possem, mihi tractanda essent. Quid, si ita faciam, inquit Siluius, ut cum in aliquam tabernam librariam venio? Conspicæta enim plurimorum, optimorumq; librorum copia, & omnes in manus sumens; quos ex indice de rebus abditis, atque occultis tractare intelligo, alijs coemendos relinquo, illos verò, qui ad has mansuetiores musas pertinent, mihi sepono, atque domum, ut legam, afferro. Sic nihil, opinor, impediet, quominus cum tu omnia, quæ ad hunc locum pertinent, more tuo, id est verissimè, & copiosissimè explicabis, ex aureo isto Philosophiæ flumine eam partem hauriam, quam ferre possum, reliquam Riccio, ac Flaminio hauriendum relinquam. Tum Riccius, Gerendus est tibi, inquit, mos omninò nobis. Aueo enim & ego te audire litem inter me, & Flaminium dirimentem, aut pro altero contra alterum iudicantem. Nam etsi ille tanto minor natu est, quam ego sum, tamen quòd te assidue audit, satis idoneum statuo, qui mihi sit aduersarius. Et quamuis si subtiliter promissa tua interpretari velis, possis fortasse te excusare, tamen summum ius, summam sis esse iniuriam. Tum Atadius, nihil inquit, à me proficisci potest,

quod vobis singulis vel nutu vestrum mihi desiderium significantibus, non sit paratissimum, nedum vniuersis tanto studio cõtendentibus, hoc, quod vultis, negare possim. Quapropter dicere aggrediar, quicquid mihi hac de re in mentem venerit, si vnum prius à vobis impetraro. Annuentibus verò nobis, & quid istud esset, interrogantibus, si apud me inquit, cænare volueritis. Nunc enim, antequam nox adueniat, quæ iam proxima est, vt ab hac dicendi, & audiendi contentione paulisper animi relaxentur, ac recreentur, surgendum, & in viam Herculeam eundum censeo: ibi tribus, aut quatuor spatijs factis domum reuertemur, & vsquè ad cænæ tempus commodè huic sermoni operam dare poterimus. Hanc igitur vobis conditionem pono, quæ si placet, dicere non recuso, sin minus, nihil est, quòd me vllum verbum esse facturum credatis. Hic, cum ego, & Siluius dubitaremus, meo quodam iure inquit Riccius, pro omnibus respondebo, nosquè ita, vt vis, esse facturos pollicebor. Nullam enim tibi recussandi rationem relinqui uolo. Tum ego, cum iam omnes exurgeremus, parum, inquam, tibi Præceptor optimè videbaris effecisse, si animum alerēs, nisi etiam corpus aluifses.

FLAMINII NOBILII DE
VERA, ET FALSA VOLVPTATE

LIBER SECVNDVS.



GGREDIEN
ti mihi ea man-
dare literis, quæ
ab optimo illo vi-
ro, & homine
sapientissimo ac-
cepi, in mentem
venit gratias
agere fortune
meæ, quæ, cum

ego nihil afferrem, quo summo iudicio præditi homi-
nes mea consuetudine delectari possent, ita tamen
tulerit, ut quocunque venerim, illis fuerim planè
intimus, qui ingenio, virtute, doctrina longè omni-
bus præstarent. Audiui adolescens, ac penè puer
domo studiorum causa profectus Remigium Me-
lioratum, & in Philosophia pereruditum, & no-
stri temporis Dialecticorum sine controuersia prin-
cipem, ex cuius priuatis, & quotidianis sermonibus;

cum ab illius latere, quo ad liceret, nunquam discederem, haud paulò maiorem vtilitatem, quam ex publicis disputationibus percepi. Deinde cum ille tristi admodum sui desiderio studiosis relicto mortem obijisset, idcircoque Pisis ego abiens Ferrariam me contulisset, in qua vrbe bonas literas in primis florere acceperam, & cum Ioan. Baptista Giraldio, Bartolomeo Riccio, Io. Baptista Pignio eloquentissimis, ac doctissimis hominibus summa mihi amicitia, atque consuetudo intercessit, & Vincentio Madio tam comi, ac beneuolo praeceptore sum usus, ut nihil incideret, quod ego minus intelligerem, quod ille priuatim copiosissime, & planissime mihi explicare grauaretur; nec vnquam omnino abnueret voluntas eius studio meo. Postremò cum Pisas, ut Parenti meo morem gererem, redijsem, & Logicam facultatem publicè profiteri cepissem, cum ijs viris mihi versari contigit, cum quibus aequè ferè libenter, atque cum Dijs immortalibus viuo. Hi sunt Vidus Vidius Florentinus, in arte medica ita tum doctrina, tum explicandi ratione excellens, ut illam de supremo loco profiteri meruerit, omnibusq; suis praeditam ornamentis sit posteris traditurus, ea variarum rerum cognitione, atq; usu, ut nihil vel illius sermonibus incundius, & ad animos auditorum tenendos aptius, vel monitis, & consilijs sapientius

piëntius excogitari possit, ea humanitate, ac probitate, ut obsit nemini, quam plurimis prosit, & alacriter, atq; amanter prosit, Julius præterea Salernius, qui ad iuris ciuilis scientiam, in qua Deus quidam auditoribus videri solet, summam eloquentiam, & in cunctis artibus, quibus ad humanitatē informari solemus, eruditionē, et optimos, suauissimosq; mores adiunxit, et Mainettus Mainetius, vir in Philosophia clarus, atq; insignis, et admirabili quadam lenitate, et comitate vitæ gratiosissimus. Quapropter Verè mihi illud videtur dici neminem ferè esse, cui in hac vita, aut omnia commoda congruant, aut omnes bonæ prosperitates sint aduersæ. Id adèò ex me intelligi potest, qui, & si multis in rebus à me non sit collaudanda fortuna, hoc tamen bono, quod commemorauì, facile omnes illius iniurias feram, atq; compensem. Proinde si prima illa ingenij laus mihi negata est, ut non multa, neq; magni ponderis in Philosophia reperire per me ipse possim, noui enim tarditatem meam, at certè secundam mihi eripi non sinam, & singulari doctrina, acerrimoque ingenio hominum, quos partim audiui, partim quotidie audio, benè inuentis obtemperabo, eaque non modò meæ, sed etiam, ne frustra natus videar, utq; illis, quam possum, gratiam referam, posterorum me moriæ commendare se dulo enitar. Quam tamen

laudem tanti fecit Zeno Stoicorum Pater, ut ab Hesiodi sententia discedens non secundam, sed primam posuerit. Pauca enim omnino propter vite breuitatem, de qua iure Theophrastus conqueri videbatur, homini quantumuis ingenioso venire in mentem possunt. Multa verò cognoscet ille, qui aliorum inuenta quasi in vnum locum conduxerit, animoq; et memoria comprehenderit. Sequamur igitur institutum nostrum, & susceptum hoc munus explicandi naturam voluptatis conficientes, ad Madij sermonem veniamus: cui præter eos, quos recensui, alij duo Auditores accesserunt. Nam cum, ut egredieremur, pedem porta efferremus, sese nobis obuiam fecerunt Horatius Malegucius, & Iulius Rugerius, quibus Regiū Lepidi patria erat, nobilitate, opibus, disciplinis liberalibus, & præsertim Philosophia florentissimi Iuuenes; qui & ipsi ad Madium salutandum, ac deducendum venerant, Ita cum his in viam Herculeam venimus, quæ Ferrariensi populo basilicæ cuiusdam instar est, & quotidie nobilibus equitibus, ac Matronarum affabrè factis cisijs referta conspicitur. Ibi aliquot spatijs factis, ad reducendum Madium omnes vna profecti sumus, atque interea cum ego Horatium, & Iulum submonuissem, quid inter nos conuenisset, sese etiam usque ad eam tempus nobiscum velle esse dice-

runt. Tum Madius, video, inquit, quid agatis, sed quanquam imparatus ad dicendum accedere non libenter soleo, tamen quod Flaminio concessi, vobis negare equum non puto. Itaque faciam, quod vultis, non tam mehercle vestro desiderio satisfaciendi spe, quam omnibus in rebus amantissimi Preceptoris officio fungendi voluntate. Nec verò dubium mihi est, quin eidem conditioni, cui reliqui steterunt, vobis quoque standum putetis. Nam si dubitarem, verbo non hiscerem. Hec dicens, nos in conclaue quoddam bibliothecæ coniunctum perduxit, atque apud ignem residere iussit; ipse autem bibliothecam ingressus, paulo post ad nos reuersus, huc in modum est exorsus. Quam copiosa, & elegans Riccij oratio in accusanda voluptate, quam item acuta Flaminij in defendenda fuerit, facile per vos Horati, & Iuli coniectura assequi potestis. Verum neuter vim, & naturam voluptatis attingere conatus est. Euenta potius hic bona, ille mala omni dicendi copia dilatarunt. Omnis autem via, & ratione suscepta disputatio, ut Principi nostro placet, à definitione sumere initium debet. Hæc enim quæstiones omnes ad exitum deducere, omnesque sedare controuersias solet. Ego igitur, qui non oratorie, ac probabiliter, ut Riccius, & Flaminius fecerunt, sed verè,

Verè, & subtiliter hanc rem à me tractari puto oportere, ab Aristotelis præcepto mihi non cenſeo diſcendum. Ordiamur igitur à voluptatis definitione. Eam ex ijs, quæ à nobis, dum libros Aristotelis de anima interpretaremur, ſunt explicata, inueſtigantes, omnibus, niſi fallor, veſtigijs aſſequemur.

Oſtendimus eo in loco ſatis accurate quemadmodum illa tractatio poſtulabat, quot, & quales eſſent animæ noſtræ partes. Erant enim tres, prima illa, qua nutrimur, & viuimus, altera qua ſentimus, poſtrema, & reliquarum perfectiſſima, qua intelligimus, & ſapimus. Declarauimus etiam quid eſſet Voluntas, & appetitus. Appetitus enim à ſenſu, Voluntas à mente, & intelligentia non re, ſed cogitatione ſecernuntur, atque appetitus nihil aliud eſt, quàm commotio quædam ipſius ſenſus, dum uel propendet in rem, quam ſibi iucundam fore exiſtimat, vel à moleſta abhorret, atq; refugit; Voluntas item nihil aliud quàm inductio, & propenſio mentis in id, quod ſibi bonum cognoscit, proſequendum, aut malum repellendum. Atqui eodem loco multa de affectionis natura, ac partibus diximus, quæ à vobis memoria teneri & cupio, & credo. Nos verò, inquit Ruggerius, optimè tenemus. Omnia enim ita tu explicare ſolitus es, vt ea non in aures transfundere, ſed in animo inſcribere videaris

propius igitur, inquit, *Ad* id, quod agimus, accedamus. Ex tribus animæ facultatibus, ad vegetabilem, quam infimum locum tenere statuimus, nullo pacto voluptatem, aut dolorem pertinere *Aristoteles* censet; quāquā *Anaxagoras*, & *Democritus* aliter fortasse existiment, qui plantas sensu præditas esse, ac dolore, voluptateq; affici constanter affirmant; sicq; vegetabilem animam cum sensu confundunt; sed huiusmodi opiniones his eruditis temporibus satis explosæ sunt. Ad *Aristotelem* igitur, & *Platonem* reuertamur, quorum de hac re eandem ferme fuisse sententiam credimus. Vegetabilis igitur animæ facultas nec voluptatem, nec dolorem accipit; reliquæ autem duæ animæ partes, sensus, & intelligentia tum voluptatis, tum doloris sunt compotes. Verum antequam longius progrediamur, illud etiam, atque etiam animaduertendum est, quod in eorundem librorum interpretatione admonuimus, facultatem ab actione multum differre, ut mentem ab ipsa cogitatione, & contemplatione, sensum oculorum ab ipsa contortione aspectus; quam si placet, visionem, & ipsum sensum, ut res clarior sit, visum appellemus. Non enim similes *Megarensium* Philosophorum haberi volumus, qui dum nihil agimus, facultate etiam agendi nos plane destitutos existimabant, quorum opinio nono libro

Theologiæ ab Aristotele firmissimis rationibus est
 confutata. Cum igitur visum dicimus, dum ipsam,
 & facultatem animæ intelligi volumus, visio autem
 est ipsius visus functio muneris (sic ego interpretor)
 eum scilicet oculis rei alicuius externæ spe-
 ciem recipimus, & per speciem rem cognoscimus.
 Quod de uno visu dictum latissime patet, & in cæ-
 teros etiam sensus, mentemque transferri commodè
 potest. Animadvertitis autem unquam, tuque
 in primis Flamini, qui huius disputationis in causa
 fuisti, à quibus causis visio pendeat? Puto, inquam,
 visionem, duo potissimum principia, duas causas
 habere, facultatem videndi, et rem extrinsecus obie-
 ctam, in cuius speciem facultas ipsa fingitur, & for-
 matur tamquam speculum quoddam, sicque forma
 ta erumpit in actum. Gaudeo, inquit Madius, cum
 ista à te bene comprehensa video. Sed perge, cau-
 samq; nobis asser, quamobrem aliquando visio man-
 ca quoddammodo, & imperfecta reddatur. Mirum,
 inquam, ni aut propter videndi facultatem non opti-
 me affectam, aut quod nulla sit rei obiectæ cum fa-
 cultate, convenientia nulla proportio, atque naturæ
 consensus. Recte, inquit Madius. Sensus enim, ve
 aiebat Aristoteles in proportionem quadam, & ut
 ita dicam, concordia consistit, quæ non aliter à rebus
 obiectis perturbari potest, atq; in fidibus harmonia

neruis vehementius pulsus, Perfecta igitur visio tunc appellanda erit, cum & facultas videndi bellissime se habebit, & illi apte congruet res obiecta, planeque consentanea erit; hac autem conditione illam quoque contineri intelligamus, ut spacium aeris, quod interiacet, bene se habeat. Hanc igitur rei obiectae conuenientiam percipiens sensus bene affectus, atque in eam totus propendens mirabili suauitate, voluptateque perfunditur. Ceterum, ut sensus paulo melius, vel deterius esse affectus potest, & similiter rei obiectae conuenientia gradus quosdam habet; ita voluptatum alia maior, alia minor existit. Et quemadmodum in fidibus cum nondum chordae ad eundem sonum peruenerunt; nihil desiderant eruditae aures, at cum primam peruenerunt, mirabiliter implentur, ac delectantur, ita cum conuenientia ista facultatis percipientis cum re obiecta ad summum deuenit, summa quoque exoritur voluptas. Voluptatis igitur natura iam fere est patefacta. Nihil enim aliud haec vox significare videtur, quam perceptionem rei obiectae; quae conuenientiam, et cognationem habeat cum facultate percipiente: sit autem facultas ipsa bene affecta, et in suo fungendo munere non impedita. Dolor autem (contrarium enim ex contrario facillime iudicatur) statuatur perceptio rei obiectae, quae discrepet, et facultati percipienti naturali quodam odio sit inimica, ipsamque male afficiat.

Quod si res obiecta neque perspicuam conuenientiam, neque discrepantiam praefereat: existet actio quodam inter uoluptatem, & dolorem interiecta intermedia, quae utriusque expers erit. Hunc dicebat Aristoteles non acrem, & exquisitam olfaciendi vim hominibus esse tributam quippe quae molesta tantum, & iucunda percipiat: medium illum statum voluptate, doloreque carentem tenere non queat. Quoniam igitur sensus, atque mens, ut suum munus obire possint, a rebus obiectis species recipiunt (est enim res saepius repetenda) & species partim conuenire, partim discrepare a sensu, & mente possunt, proportionem autem seruata mirabilem iucunditatem oriri perspicimus: rata, firmaque sit voluptatis finitio, quam attulimus, ut voluptas sit perceptio, & comprehensio rei obiectae, quae proportionem, conuenientiam, naturae coniunctionem habeat cum facultate comprehendente bene affecta, & non impedita. Atque haec definitio ita quidem late patet, ita se fundit, ut non modo sensus, & nostrae intelligentiae voluptati conueniat, sed etiam incredibilem suauitatem illam, quam beatae, & ab omni materiae admixtione segregatae mentes percipiunt, quodammodo complectatur. Et enim quaquam ille a rebus externis species non recipiunt, ratione tamen, & cogitatione in ipsis quoque vis intelligens a re intellecta secernitur. Cum

autem

autem re non secernatur, mirabilisq; conuenientia, & naturæ coniunctio adsit, verissimèq; ex illis vñ efficiatur, perfectione autē illarum natura reliquæ omnes infinitis propè partibus excedat, quid mirū, si simplici etiam, perpetua, omnibus numeris absoluta voluptate potiantur? Quamquam de hac re inferius etiam dabitur dicendi locus.

Hoc loco, cum Madius aliquantulum à dicendo quieuiſſet, verè mihi, atq; ita vti est, inquit Malegius, videris naturam voluptatis exposuisse, memini què non multò secus ab Aristotele septimo libro de moribus esse explicatam. Ibi enim statuebat voluptatem nihil aliud esse, quàm functionem muneris non impeditam habitus illius, qui cum natura consentiat. Quibus verbis hoc significari puto, tunc in mente existere voluptatem, cum illa habitu suæ naturæ accommodato, qualis sapientia est, perpolitâ suo munere expeditè fungitur, & in contemplatione versatur; similiter in sensu existere, cum ille acer, atquè vigenſ benè, ac celeriter percipit, quæ ab ipso percipienda sunt. Hæc igitur Aristotelica definitio à tua non videtur discrepare. Ac si quod sentio dicendum est, ista tua, nihil puto afferri posse perfectius. Ceterum verba nonnulla, quæ ab eodem Aristotele decimo deindè libro proferuntur, semper me mirabiliter corserunt. Ibi enim primùm statuit

Voluptatem perficere muneris functionem mentis,
& sensus, non tanquam habitum penitus insitum,
sed ut finem quendam inde exorientem, veluti eos,
qui in ætatis flore sunt, perficit decor ille iuuenilis,
& venustas. Deinde hæc addit. Non tamen
videtur voluptas, aut ratio, aut sensus esse.
Absurdū enim fuerit, sed propterea quod
non separantur, idem esse nonnulli existi-
mant. Quæ quidem sententia ab omnibus et Græ-
cis, & Latinis, qui ad manus meas perucnerint, ita
explicatur, ut cum inquit Διχνοια, & αὐτῶν idem
significet, ac si dixisset, Διχνοια καὶ αὐτῶν ἐστὶν ἐπὶ τῆς
id est rationis, & sensus actio, atque muneris fun-
ctio. Ergo voluptatem idem esse statuere, quod fun-
ctionem muneris. absurdum est. Hæc igitur sunt
quæ mihi semper negotium facesserunt, quæque à te
explicari discuperem. Quanquam licet nimis me
ineptum, ac molestum iudicetis, qui tam diuinæ ora-
tionis cursum leuibus fortasse dubitationibus meis
interpellem. Imò, inquit Madius, isthuc eram, illaq;
verba tacitus memoria repetebam, ac perpēdebam.
Nec verò gratius mihi quicquā accidet, quàm si om-
nia, quæcunque in mentem vobis venerint, in me-
diū proferetis: sermo enim meus vestris precibus
institutus, ac susceptus, ad vestram etiam volun-
tatem accommodari debet. Videndum igitur di-

ligenter est, ut tu modò Horati dicebas, ne verba illa decimi libri nostram sententiam frangant. Sed præstat, ut hæc facilius, ac verius possimus interpretari, aliàm quandam sententiam eodem decimo libro positam examinare. Ea est, si verbum de verbo exprimere velimus. Perficit autem muneris functionem voluptas; sed non ita perficit, ut res subiecta, & sensus ipse, cum benè se habent; quæadmodum bona valetudo aliter in causa est, cur aliquis valeat, aliter medicus. Horum verborum hæc sententia videtur esse. Aliter muneris functionem ipsius sensus perficit voluptas, aliteret id, quod sensu percipitur, & sensus. Voluptas enim, ut forma perficit, quemadmodum bona valetudo benè valentem hominem. Id autem, quod sensu percipitur, & sensus, ut moventia quædam perficiunt. Quamvis autem Eustratius scripturam immutet, tamen quod ad voluptatem attinet, eadem sententia manet. Atqui ex hac bonæ valetudinis similitudine, quæ ab Aristotele affertur, colligi posse videtur, voluptatem esse habitum planè insitum, & quasi formam functionis muneris sensus, & intelligentiæ. Bona enim valetudo in homine benè valente habitus quidam insitus videtur esse. Dicemus igitur secum pugnantia loqui Aristotelem? Nihil unquam tanti nobis

sit, quo debitam illi observantiam, pietatemq. vole-
 mus, fateamurq. potius à nobis non intelligi, quam
 sibi ipsum non semper constare. Verum ut intelli-
 gamus, summum studium est adhibendum. Præ-
 clarè enim à nobis opera ponetur. Equidem hanc
 rem diligentissimè perpendens, vix adduci pos-
 sum, ut de sententia decedam, voluptatemq. ab
 ipsa met muneris functione sensus, & intelligentiæ
 credam discrepare. Nam cum voluptas non in ap-
 petendo, sed in sentiendo, & intelligendo consistat,
 in sentiendo autem, & intelligendo nihil aliud spe-
 ctetur, quam facultas percipiens, species recepta, &
 huius speciei usus, atq. functio, profecto, quando vo-
 luptas, ut satis est perspicuum, neq. species recepta,
 neque facultas percipiens verè statui potest, ipsam
 met esse functionem, & actionem, aut certè quid-
 dam illi simillimum concedamus oportet. Quid
 ergo sibi volunt verba superius ex Aristotele alla-
 ta? Illud, nisi me mea fallit opinio, posse functionem
 muneris, si univèrsè spectetur, à voluptate separari:
 est enim aliqua functio muneris plena doloris. At
 si voluptas esset habitus planè insitus, & forma
 perpetua, omnis semper muneris functio iucunda
 esset (quod est perspicuè falsum) forma enim ab
 eo, cuius est forma, non separatur. Est igitur habi-
 tus, & absolutio non omnis functionis, sed optimè

se habentis, ut bona valetudo non omnis hominis habitus, & forma est, sed bene valentis hominis, et ~~pietatis~~ illa, id est, decor quidam, atq; splendor iuuenilis non omnem etatem sequitur, sed etatis florem, vel idem potius cum hoc flore etatis censi potest. Si igitur spectemus muneris functionem sine voluptate reperiri posse, sic voluptatem finem potius exorientem, quam habitum planè insitum statuemus, sin autem totum hoc, functionem muneris perfectam, & absolutam sumamus, voluptatem esse ipsius formam, & habitum non est negandum. Sed ut sunt celeres, atque repentini animorum motus, nunc mihi occurrit, quod à vobis etiam, atq; etiam animadverti velim. Specie enim certè, si minus re ipsa, magnū quiddā videtur esse. Ex perceptione illa rei obiectæ, quæ facultati percipienti quadam naturæ cōiunctione sit accommodata, atq; cōsentanea, expletio quædā ipsius facultatis existit, quam fortasse voluptatem esse verissimè statuere possimus. Ita perceptio, atque cognitio rem obiectam spectabit, quæ comprehenditur, voluptas autem facultatem percipientem, quæ ex perfecta perceptione expletur, atque perficitur, sic aptissimè Aristotel. voluptatem finem exorientem appellare potuerit, atque hæc alia verba, quæ eodem decimo libr. leguntur, adiungere. Verum muneris functio

nibus propinquiores, & cōiunctiores sunt
 eæ, quæ in eis insunt voluptates, quàm ap-
 petitiones. Hæ enim distinctæ sunt, & tem-
 poribus, & natura; illæ functionibus mu-
 neris sunt proximæ, & cohærent, itaque
 sunt indistinctæ, & confusæ, vt controuer-
 sia sit, an idem sit muneris functio, quod
 voluptas. *Hoc inuentum si placet, ita voluptas*
optimè desinetur, expletio facultatis percipientis, ob
rei obiectæ expeditam perceptionem, quæ res cum fa-
cultate perspicuam habeat cōuenientiam. Voluptas
autē mentis à felicitatis notione distinguetur, quod
voluptas, vnius facultatis percipientis expletio à no-
bis intelligitur, felicitatis autem vocabulum hoc præ-
terea significat, in ea facultatis percipientis absolutio-
ne, perfectioneq; naturæ, etiam ipsius humanæ perfe-
ctionem consistere, præsertim si nonnulla alia, vt va-
letudo, et mediocris bonorum externorum copia, eo-
dem accesserint. Augere autem, & amplificare di-
citur muneris functionem voluptas, quoniam appe-
titus in id, quod sensum, voluntas in id, quod intel-
ligentiam explet, maximè propendent. Nos quæ ad
ea gerenda, quibus voluptas comparatur, impellunt.
Atque omnimò quæque muneris functio, quod perfe-
ctior est, eò etiam diuturnior; vt qui acri oculorum
acie præditus est, minus aspiciendo defatigatur

squàm qui hebeti. Hinc etiam causa reddi potest,
 cur rerù nouitate maximè delectemur. Sensus enim
 & mens nouitate illa excitata, cognoscendiquè au-
 da se ipsam quasi exacuit, idcircoque perfectius suo
 fungitur munere, & maiorem inde haurit volupta-
 tem. Hæc igitur mihi de voluptatis natura in mentē
 -venerunt, quæ vobis probata esse vehementer cupio.
 Quamobrem antequam ad ea, quæ sequuntur, aggre-
 diar, scire velim, si quid habeatis ad hæc. Tum Ric-
 cius. Quanta inquit, est vis veritatis, quamquè
 lucē sua omnes dubitationum nubeculas disijcit.
 Nam mihi quidem tua definitio exorta, ut inquit
 ille, veluti ætherius Sol, totam voluptatis natu-
 ram videtur illustrasse, maximèquè perspicuam
 reddidisse. Idem iudicium ab his eruditissimis iu-
 uenibus video fieri, qui orationem tuam non lau-
 de, quod iam vulgare commendationis genus est,
 sed tacita admiratione sunt prosequuti. Quam-
 quàm fortasse non deessent ex istis, qui subtilita-
 tis, & acuminis laudem sedulò aucupantur, qui
 huic patefactæ veritati obscuris quibusdam argu-
 menti tenebras offundere conarentur, ac vetere pro-
 uerbio nodum quærent in scirpo. Vera narras, in-
 quit Rugerius. Nam ego audiui aliquandò Cla-
 rum Philosophū, qui posteriorē partem allatæ à Ma-
 dio definitionis omninò falsā putabat; in qua parte

dicebatur proportionem seruata inter rem obiectam, et facultatem percipientem, existere, atq; oriri voluptatem. Obijciebat illud primum, proportionem & convenientiam, ut secundo libro de anima docuit Auerroës, esse relationem quandam (sic nostri dicunt, *M. Tullius in libr. de vniuersitate comparationem videtur appellare*) relatio autem apud Peripateticos nullam habet efficientiam. Qua igitur ratione voluptatis esse effectrix poterit? Secundo loco statuabat, multa esse, quæ propè sensum posita dolorem pariant, procul autem sint voluptati; ut in odoribus cernitur, quorum plurimi propè nares positi molesti sunt, procul verò gratissimi: Multa item, quæ sensum accedentia ad sensum, delectent, cursim irruentia offendant, maximumq; inferant dolorem, ut si membris nimio frigore concretis suum repente calorē restituere conemur, mirabiliter torqueamur, & excruciemur voluptatem percepturi, si sensum restitueremus. At eadem semper proportio facultatis cum re obiecta manere videtur, aut illa res propè sit, aut longius, aut sensum accedat, aut cōfestim irruat. Ergo isthac proportio vera, & propria voluptatis causa non erat. Hæc ille, quæ & si specie aliquid videntur, ego tamen re nihil esse opinor. Non iniuria, inquit Madius, Nam secundum quidem argumentum, ut illud priore loco reprehendamus, huiusmodi

iusmodi est, de qui illud tāquā validū, firmūq; affe-
runt, planē in Phisicis plumbei esse videantur. Quē-
admodum enim haud paulo maior calor exempli cau-
sa ab igne, si propē sit, ad sēsūm peruenit, quā si pro-
cul positus esset, sic etiam eandem non manere propor-
tionē clarum, perspicuumq; meo iudicio est. In primo
autem argumēto plus fortasse roboris, ac neruorū est,
quā ut cōtemnere, minus certē, quā ut pertime-
scere debeamus. Relatio inquit, nullam efficiētiā ha-
bet, id verum est, at nos nudā, simplicemq; proportio-
nem voluptatis esse causam non pōnimus sed rē ipsam
obiectam, quē sua quadam vi facultatē iucunde affi-
ciat, quam tamen vim proportio hęc, & conueniētia
sequitur, idcircoq; his vocibus significari potest, quēad-
modum etiam a Patre filium generari dicimus non
quod relatione illa generetur, sed quoniam pater adhi-
bet quandam vim, & efficiētiā, quam relatio illa
consequitur. Sunt igitur hęc argumenta non intelligē-
tis sententiam nostram, & facile refelluntur. Defini-
tione voluptatis cōstituta, & multis, quē illi officere
videbantur, propulsatis, ad vēstram Rēci, & Flami-
ni litē dirimendam accedamus. Tum Malegutus,
Memini, inquit, cum verba illa Aristotelis modō
exponeres, positū a te esse voluptatem in sentiēdo, &
intelligēdo, non in appetēdo consistere. Quam ta-
men rē in magnā apud Peripateticos cadere quē-

tionem scio. Eam vellem, antea quā ad alia pergas, explicari. Plenis scilicet velis, inquit Madius, cum temerē ē portu egressi sumus, est nauigandum. Veniat igitur in medium questio ista, habeat ne sedem suam voluptas in sensu, an potius in appetitu, in mente, an voluntate. Ac primum de sensu, & appetitu disquiramus. Hoc enim probe cognito, facile etiam de mente, & voluntate controuersia sedabitur. Qui igitur voluptatem ad appetitum potius, quā sensum pertinere putant, eoq; voluptatem vocant facultatis appetentis cum bono optato cōiunctionem, copulationemq; & mirificam quandam tranquillitatem (in quibus fortasse Lucretius fuit, qui dixit. Requies hominum, Diuinūq; voluptas) multis, validisq; agere argumentis possunt. Primum si aduersa sub eodem genere collocantur, ut sub colore nigredo, et candor, voluptas autem, & dolor aduersa sunt, certē si dolor est perpesio, ut Aristoteles in Topicis inquit, voluptas quoq; perpesio quaedam erit. At perceptio sensus non est perpesio, sed potius quaedā functio muneris, & actio. Ergo voluptas in perceptione sensus nō est collocanda. Deinde illud euenire quotidie cernimus, ut si quis puellam perditē amet, deturq; ei forte fortuna illius manū attingere, incredibili dulcedine perfundatur, ubi verò ardor ille deferbuerit, si eandem manum tetigerit, nullā amplius, aut certē perexiguam sentiat voluptatem. Id

autem aliunde proficisci nō potest, quā quod eadem cupiditas, ac libido nō manet, quāvis eadē sit perceptio sensus. Appetitus igitur, non sensus magnē illius voluptatis efficiens erat: quare in appetitu, nō in sensu voluptas erit reponenda. Quid multa? Voluptas, et Dolor sunt affectiones, ut ostendemus, ergo ad appetitū omnino pertinent. Nā ut aliās declarauimus, affectio nihil aliud planē est, quā ipsemet appetitus sese prodēs, et erūpens in actum. Ostendemus autē quod polliciti sumus ex ijs, quę tertio lib: de morib: sunt ab Arist. tradita. Statuit enī Fortitudinem in dolore cōprimendo; Temperantiā in cōpescenda voluptate consistere, cum tamen easdem virtutes in affectionibus, tanquā in subiecta materia versari antea apertē dixisset. Quāobrem omnes ferē veteres Peripatetici, & Platonici, vbiq; voluptatem, et dolorē maximē omniū vehementes, præpotentesq; affectiones nuncupant: atq; omnino hæc maximē omniū principia motus esse videntur (dolor enim, et voluptate incitati facile huc, & illhuc impellimur) quod nō sensus, sed facultatis appetentis propriū esse Arist. censuit. His igitur argumentis, qui putāt voluptatē in appetitu residere, satis tueri videbuntur sententiam suā. Cōtrā qui voluptatē ad sensum referunt, multa, nec infirmiora afferunt argumenta. Primum statuunt, quod multo verissimū est, & à me initio huius disputationis positū, appetitum esse cō-

motionem sensus ad rem, quā sibi iucundam iudicat,
 prosequendā, vel molestā declinandā. Ex quo pri-
 mo lib. Rhetoric: cupiditatem desiniebat Aristoteles
 iucundi appetitionem. Hinc verò concludunt necessa-
 riò à sensu prius esse perceptam iucunditatem, vel mo-
 lestiam, quā emergat appetitio. Ergo tū voluptas,
 tū dolor in sensu spectari debent, nō in appetitu. De-
 inde cōmuni quodam sensu cōprobant. Vir tēperans,
 si aliquando liberis det operam, multò maiore sentiet
 voluptatem, quā intemperans, qui diuturno vsu vo-
 luptatis, illius sibi ipse sensum ademit. Quòd si in ap-
 petitu voluptas consisteret, cōtra eueniret. Temperans
 enim minimam sentiret voluptatem, cuius appetitus
 iam est castigatus, & ad moderationem redactus.
 Intemperans maximam, qui vehementi libidine fer-
 tur incitatus. Idem in dolore reperias. Etenim cū cru-
 delissimi Tyranni iussu ferreis malleis Anaxarchus
 tunderetur, cum Zeno, cum Atilius Regulus, ingen-
 tibus cruciatibus torquerentur, nō ne censes maximū
 illos dolorem cēpisse? Non est dubitandum. Appeti-
 tus tamen virtutis robore confirmatus mediocriter cō-
 mouebatur. Hinc praeclare ille voces sunt audite. (cla-
 mabat Anaxarchus, tunde, tunde Anaxarchi utrē,
 Anaxarchum non potes tondere. Atilius Thorio po-
 tante in rosa beatiorem se esse profitebatur. Zeno autē
 suis ipse dentibus linguam sibi abscidit, ne quē sibi cre-

dita erāt arcana, et occulta prodere cogeretur. Atqui
 Ut idem onus cōtento corpore facillimè fertur, remissò
 opprimit, sic idem dolor, eadem voluptas fortem, &
 temperatum virum mediocriter mouet, ignauum, &
 intemperantem rapit secum, atq; de statu deijcit. Ad
 sensum igitur voluptas sine dubio est referenda. Præ-
 terea Verò dolorem, & voluptatem non modò inter
 affectiones esse recensendas, non concedunt, sed cōtrā
 afferunt locum Aristotelis, in quo perspicuè illud vide-
 tur negare. Inquit enim secundo libr. de moribus dum
 affectionem ab habitu, & facultate seiungeret. Affe-
 ctiones autem voco cupiditatem, iram, ex-
 candescentiam, odium desiderium, timorē,
 spem, inuidiam, gaudium, beneuolentiam,
 æmulationē, misericordiam, ea deniquè om-
 nia, quæ voluptas, vel dolor consequitur.
 Ergo si affectiones omnes voluptas, vel dolor consequi-
 tur, nihil autem se ipsum consequi dicimus, conclu-
 dum certè est voluptatem ab affectione plurimū dif-
 fere. Adde affectiones ab Aristot. animi motus appella-
 ri, cum tamen in decimo libro de moribus multis, fir-
 misquè rationibus concludat, voluptatem nullo pacto
 conuenire cum motu. Sed ut hæc dissolui fortasse
 possint, verba certè illa, quæ superius ex eodem dec. libr.
 attulimus, omnem tollere dubitationem videntur.
 Cum in illis affirmet voluptatē ab appetitione tūm na-

tura, tū tempore esse distinctā. Prius enim cupimus, deinde si cōsequamur, perfundimur voluptate. Per obsecura igitur questio est, & magnæ, arduæq; cognitionis indiget. Verū nobis iam, quid statuamus, consultatione nihil est opus. Nam & in libris de anima sententiam nostrā exponere veriti nō sumus, cum de affectionibus agentes, voluptatē, & dolorē ab illis distinguemus: et nunc in voluptatis definitione cōstituenti, cū ipsam perceptionem nūcuparemus, aperte in sensu collocauimus. Quod tamen ex ore ipsius Arist. si diligenter vndecimū cap. i. lib. Rhetoricorum legeritis, mitti iudicabitis. Eorum igitur, qui aliter existimant, argumēta sunt refellenda. Primū autem illud intelligatur, cum appetitus maximè sit cōiunctus, atq; copulatus cū sensu, vel potius, ut sepe diximus, reapse non differant, in appetitu autem prima affectio inest illa, qua in voluptatem propendet, abhorret autē à dolore, Hinc euenire, ut voluptas, et dolor nō modò perceptionem sensus significant, aut iucundā, aut molestā, sed etiam ipsam appetitus propensionem, vel cōtractionem. Id autem multis alijs in rebus euenire cernimus. Voluntas apud Aristotelem facultatē illam significat, qua mens nostra mouetur, ad bonum amplectendum, & euitandum malum. Significat tamen aliquando actionem etiam ipsius facultatis, qua quidem ferimur in finem (sicq; ab electione secernitur,

que in ijs potius versatur, quæ conducunt ad finem) quoniã actio hæc facultati illi maximè cognata, atq; proxima est, proptereaq; eodem nomine appellatur. Intelligentia itidem facultatem animi significat, qua intelligimus, & sapimus, significat etiam habitum, quo rerum principia, & causas cognoscimus, quoniã hic habitus naturæ ipsius facultatis intelligentis maximè proprius est. Hæc ex tert. lib. de moribus, & sexto sunt accepta. Sic etiam in libris de anima facultatem illã animæ quã phantasiam dicimus, cum muneris functione, dum illam Aristoteles desinit, videtur confundere. Eadem igitur ratione voluptas, & dolor, ut dicebamus, non modò perceptionem vel iucundam, vel molestam sensus significant, sed etiam cõmotionem appetitus, qua voluptati, tãquã bono optato hæremus, & à dolore refugimus; quòd affectiones hæ perceptionem sensus statim cõsequuntur, et ad ipsas, tanquam caput, & originem reliquæ omnes affectiones referuntur; Quanquã si proprijs vocibus uti velimus, amor potius, & odium, ut in libris de anima diximus, appellari debent. Amor enim propensionem illam appetitus in rem iucundam, odium verò fugam, declinationemq; à re molesta significat. Sed ob causam expositam confunduntur. Hoc probè fixo, & stabilito, facile reprehensorum vitia diluentur. Iam enim apparet, quo pacto voluptas & dolor affectiones, & principia

motus appellari queant. Significant enī propter quamdam naturę conuñctionem vñ etiam appetentem, ad quam pertinent affectiones omnes, quęq; principii est omnis motus. Ad illud autem, quod priore loco proponebatur, respondemus, primum exempli causa in Topicis dolorem nuncupari perpeñsionem. Deinde, vt verè dicatur, & ex Aristotelis ipsius sententia, eodem pacto dolorem appellari posse perpeñsionem asserimus, quo perceptionem, et cognitionem omnem. Nam in omni cognitione necessario pręit ipsa perpeñsio: nisi enim species rerum obiectarum reciperemus, et quasi pateremur, nihil vnquam percipere possemus. Voluptatis autem illius, quam in manu puellę amatę tangenda maximam capimus, verissimam, vt arbitror, causam ex ijs, quę iam diximus, asseremus. Amor enim, vt de nouitate dicebamus, sensum quasi exacuit, efficitq; vt in rem obiectam magis in cumbat, & contentius agat, suoq; munere perfectius fungatur, vt qui intentis oculis rem aliquam intuentur: quapropter nihil mirum si maior ad ipsum peruenit voluptas, quàm cum deserbuit ardor ille cupiditatis. Ratum igitur, firmumq; sit, voluptatem in sensu consistere, non in appetitu: ex quo sequitur etiam in nobilissima, & diuina animę nostrę parte, voluptatem ad intelligentiam pertinere, non ad voluntatem. Idem enim iudicium, vt millies diximus, de appetitu, &

tu, & voluntate, idem de sensu, & intelligentia est faciendum. Prius enim mens nostra rem obiectam bonam, suęq; naturę accommodatam, & iucundam percipiat omninò necesse est, quàm voluntas ad appetendum excitetur. Hac profligata, & ad exitum deducta questione existit alia, quę & ipsa, quando omnia, quę ad hunc locum illustrandum faciunt, explicare aggressi sumus, diligenter, accuratęq; tractari postulat. Due enim sunt in mente, & intelligentia perceptiones, quarum Latini vnā rectā, alterā reflexā appellant. Primò namq; animus exempli causa dulcedinem percipit, quę prima perceptio ex ipsius rei, quę obiecta est, suauitate oriri videtur, & recta ab istis nominatur, deinde quasi in se ipse reuersus dulcedinem se consequutū cogitat, istaq; cogitatio ab iisdē vocatur reflexa. Cum igitur hę due perceptiones, tū perspicuē in mente, & intelligentia reperiantur, tū etiā, ut nonnulli existimāt in sensu, in vtra potius sit locanda voluptas cadit in questionem. Istud inquit Ruggerius, cupide expectamus. Vester, Madius inquit, nutus, fidem mihi faciebat. Alij igitur in priorē, alij in posteriore perceptione voluptatem posuerunt; quorum controuersiam cum vtrorumquē rationibus exponere, ut hic locus benè intelligatur, necesse est. Qui igitur in posteriore ponunt, sic argumentantur. Posterior perceptio prioris accessio quędam,

Et absolutio videtur esse. Perfectissima autem, quæq;
 Et absolutissima voluptatem maximè parere rationi
 consentaneum est. Ergo ad posteriorem illam percep-
 tionem voluptas maximè pertinebit. Quod spectans
 Epicurus beati vitam in conspiciendis, totaque mente
 contrectandis varijs voluptatibus positam esse affir-
 mare non est veritus. Qui autem in priore percep-
 tione ponunt, primum putant Aristotelis sententiam à
 se defendi, qui posteriorem hanc perceptionem de vo-
 luptate tractans ne nutu quidem significauit. Deinde
 istas duas perceptiones aiunt re non esse fortasse diuer-
 sas, neq; id ab Aristotelis sententia secundo lib. de ani-
 ma explicata est alienū; præterea ut diuerse sint, non
 ad eandem fortasse facultatem ambas referri percep-
 tiones. Dicebat enim Arist. in libello de somno, Et vi-
 gilia quòd cernamus, non iudicare nos visu, sed alia
 quadam superiore facultate. Cum igitur sua etiam vo-
 luptas visui, sua tactui, et reliquis externis sensibus sit
 assignāda, et in istis sēsibus posteriori perceptioni nihil
 sit relictū loci, sequitur ut voluptas in priore, nō in po-
 steriore perceptione consistat. Ceterū quoniā suprema
 saltem animæ nostræ facultas, mens inquam, Et in-
 telligentia non modò res obiectas cognoscit, sed etiam
 percipit se cognoscere, nequè ipsius etiam voluptatem
 in posteriore perceptione concedunt, sed in priore affir-
 mant esse collocandam. Facultati enim nobilissimæ,

Et præstantissimæ præstantissima res obiecta summam inter cæteras omnes voluptatem afferat, necesse est. At cum mens, ut exemplis res satis obscura illustretur, Principem illum Deum conditorem, moderatoremquè huius vniuersitatis contemplatur, quæ res obijci amplius potest, quæ dignitate, perfectioneq; Deum antecellat, aut æquet, aut proximè ad ipsum accedat? Maxima igitur omnium, quæ excogitari possint, voluptas in Dei contemplatione, & cognitione, quæ prior perceptio est, non in posteriore sentietur. Argumentum autem, quo altera opinione nitebatur facile refellitur. Est enim posterior perceptio quasi quædam appendicula prioris. Quapropter ut idem ille Deus Opti. Max. si summa cum infimis conferre fas est, se ipsum intelligendo suam satis obtinet perfectionem, nihilq; extrinsecus desiderat, cognoscit tamen & reliqua omnia, quæcunque sunt, fuerunt, futura sunt, quasi redundantia quadam cognitionis, & hæc à Theologis nostris perfectio secundaria nuncupatur: ita mens nostra res dignitate, & perfectione excellentes, suæquè facultati cognatas contemplando præcipua afficitur voluptate, secundo autem loco posteriore etiam illa perceptione delectatur, quæ prioris, ut dicebamus est appendix. Hac exposita Peripateticorum controuersia, quanquam illa quidem non sit eiusmo-

di, ut alteri prorsus, nihil dicere putentur, nobis tamen sententia illa, quam secundo loco explicauimus, multo verior, & firmitioribus munita rationibus, decretisque Aristotelicis magis consentanea videtur. Eam igitur libentissime sequemur, & voluptatem in priore potissimum perceptione consistere statuemus. Hæc ad voluptatis definitionem, quam principio attulimus illustrandam, confirmandamque satis fortasse erunt. Nunc de dolore non nulla dicamus, ut cui voluptati aduersetur, intelligatur.

Sensus apud Peripateticos, quorum potissimum sententias adamamus, est quædam forma ex materie latebris eruta, atque instrumento corporeo vitur, quod ex elementorum temperatione constat. Potest autem temperamentum istud à re obiecta ledi, atque dissolui, vnde continuo dolor ortum ducit. Ut enim à re obiecta, quæ conuenientiam, naturæque conjunctionem habet cum facultate percipiente, atque ipsius temperamento, voluptas profisciscitur, ita si res obiecta instrumenti temperamento aduersetur, facultati etiam repugnabit, parietque dolorem. Quapropter in quæstione illa de causis doloris diu, multumque à medicis tractata verissime mihi Petrus Aponensis sensisse videtur, discrepantiam statuens, siue ut ipse inquit, disproportionem rei obie-

Etæ præcipuam esse causam doloris, quæ quidem discrepantia intemperiei nomine, nisi fallor, ab Auerroce appellata fuit, idcircoquæ ab illius etiam sententia non discedimus. Quod autem ad continui, ut omnes nostri Medici vocant, solutionem attinet, equidem existimo ab illa inferri dolorem, ut motus quidam est naturæ nostræ maximè aduersarius, atquæ ab ea maximè discrepans, & à sensu hæc discrepantia percipitur, præterea etiam ratione rei extrinsecus obiectæ diuidentis, et dissoluentis, quæ aut acuta est, aut dura, aut alijs de causis naturæ sentientis facultatis, illiusquæ instrumento aduersatur. Mens autem, & intelligentia diuinitatis sinè dubio particeps, & instrumento corporeo non affixa nihil suapte natura habet, quod illi repugnet, & omnes species recipere pariter potest, ex quo à rebus obiectis non leditur, nequæ dolorem sentit, nisi fortasse ex rei, quam cognoscere aueret, ignoratione, et ita ex quadam priuatione, ut optime à Platone in dialogo illo, qui Philebus inscribitur, est explicatum. Habet tamen ex rebus, quæ intelligentia percipiuntur, vna maiorem conuenientiam cum ipsa mente, quàm altera, & ita maioris, minorisquæ voluptatis est efficiens. Nec verò sequitur, si dolor non est in mente, nequæ etiam maiorem, & minorem voluptatem esse posse. Non enim admistione con-

trarij omnia remittuntur, sed ea tantum, quibus contraria altera ex parte respondent. Hinc commodissime ratio reddi potest, cur inter reliquos sensus maxime omnium tactus dolorem percipiat, ita ut dolor propriè tactui convenire videatur, ad ceteros sensus molestia potius quædam, quàm dolor pertineat. Tactus enim maxime corporeo utitur instrumento, cuius quidem temperamentum facile ledi, dissoluique potest, proptereaquè dolori maxime est expositus. Reliquorum verò sensuum, cum puriore, & subtiliore consistant instrumento, vix temperamentum perverti potest, nisi una quoque instrumentum tactus ledatur, & violetur. Quocirca Aristoteles definitionem illam Platonice voluptatis perpendens, in qua dicebatur voluptatem ex indigentie expletionem oriri, concedebat in gustu, & tactu id verum esse, quorum instrumentum maxime crassum, concretumque est, facileque diffluit, ac dilabitur, idcircoque refici postulant, & dum reficiuntur, maximam sentiunt voluptatem. Reliquorum autem sensuum instrumenta non ita evanescent, idcircoque nulla expletionem, & quasi supplemento egentes sunt tamen compotes voluptatis. Quamobrem dicebat finitionem illam non omnibus sensibus usque quaque convenire. Quanquam veritate perpendenti eadem utriusque sententia esse videbitur.

Duplex enim indigentia reperitur, altera rei alicuius, quæ amissa est, altera rei, quæ non est amissa, sed acquiri tamen, & obtineri potest. Duplex item expletio, indigentia altera ex parte respondens. Priore notione accepta indigentia gustui, & tactui potissimum conuenit, cum enim dissoluiuntur, amittunt aliquod, itaque si reficiuntur, mirificam sentiunt voluptatem. Posteriore verò in reliquis etiam sensibus, locum habet. Et si enim nihil amiserint, possunt tamen adhuc magis perfici, eamque perfectionem dum consequuntur, & expleri dici possunt, & re vera voluptate potiuntur. Hanc igitur putamus fuisse Platonis sententiam in eodem dialogo de summo bono aperte explicatam, atque Aristotelicæ omnino congruentem. Nam Aristoteles quoque, undecimo capitu. primi libr. Rhetoricorum, cuius iam sæpè mentionem fecimus discendo nos expleri, atque ad naturalem statum reuerti asseruit. Dolor igitur, ut ad propositum reuertamur, in tactu, & gustu spectatus, in eorum contrariorum genere reponetur, quæ aduersa à Mar. Tullio appellantur, ex primit enim aduersam quandam naturam voluptati, sicuti calor frigori, in intelligentia autem, & cæteris fortasse sensibus aut locum non habet, aut si habet, in priuantium potius genere statuatur. Nunc voluptatis partitionem ab Aristotele alla-

tam exponere, nisi quid aliud mea vultis commo-
 dum erit, propositæ quæ tractationi maximè necessa-
 rium. Nihil malumus aliud, omnes ferè una vo-
 ce respondimus. Tum ille. Principio cum duplex in
 nobis perceptio sit, una intelligentie, et mētis, altera
 sensus, duplicē etiā voluptatē existere necesse est, alte-
 ram, quæ ad sensum alterā quæ ad intelligentiā per-
 tineat. De hac posterius loquemur. Illam autem, quæ
 sensus titillantur, & quasi liquefiunt, in duo rursus
 genera Aristoteles distribuit. Aut enim ex natu-
 ræ instinctu provenit, aut contrā naturam existit.
 Naturalem voluptatem eam vocat, quæ cum na-
 turam reficiat, & recreet, ab omnibus, aut pluribus
 appetitur. Atque huius rursus voluptatis alia cun-
 ctis animantibus est communis, alia uni dunta-
 xat speciei propria, & accommodata. Nam quod
 ex cibo, & potu, & rerum venerearum usu, volu-
 ptas percipitur, commune omnibus animantibus
 est. Quod autem singule species, ut naturam ha-
 bent à reliquis diversam, & dissipatam, sic certis
 quibusdam, & naturæ suæ accommodatis rebus de-
 lectetur, in eo naturalis quidem, attamen non iam
 communis, sed propria conspicitur voluptas. Nam
 cum id volupe cuiquæ videatur, quod suæ naturæ
 maximè est cognatum, & consentaneum, certè
 diversas naturas diversæ voluptates consequantur
 oportet.

oportet. Hinc dicebat Heraclitus certam, & quasi propriam singulis animantibus cupiditatem, voluptatemq; esse assignatam. Hinc egregie doctissimus, & suavisimus Poeta Virgilius.

- „ Torua leena lupum sequitur, lupus ipse capellam
- „ Florentem Cytisum sequitur lasciuia capella
- „ Te corydon o Alexi, trahit sua quenq; voluptas.

Naturalis igitur voluptas ab Aristotele appellatur, quæ aut omnibus animantibus, aut uni saltem speciei conuenit. Contrà naturam autem eas vocat quæ partim propter debilitationes corporum, partim propter male consuetudinis corruptelam, partim propter vitiosas naturas iucundæ sunt, & expetuntur. Ex quibus immanes, & planè ferini habitus proficiuntur; qualis erat eius mulieris, quam dicunt gravidis mulieribus apertis, & perfectis pueros deuorare summa voluptate solitam; aut qualis agrestium quorundam circa Pontum populorum; quorum alios crudis, alios humanis carnibus delectari ferunt, alios liberos suos inter se mutuas in epulis dare. Ferini igitur hi sunt habitus. Alij propter morbos; & furores nonnullis innascuntur, qualis illius fuit, qui matrem immolauit, & comedit, & qui conserui iecur. Alij ex diuturna consuetudine oriuntur, ut pilorum emulsiones, & unguium corro-

fiones, carbonum quoque, & terræ. Huiusmodi igitur habitus voluptates à natura abhorrentes pariunt. Hæ autem quamvis in hominibus sæpius, & euidentius sint, aliquandò tamen etiam in bestiis conspiciuntur: Ut in cane, cum inusitata rabie in homines inuadit. Potest autem voluptatis illius, qua sensus commouetur, alia afferri partitio. Quot enim sensus sunt, tot etiam voluptatum genera existunt. Sensus autem vel interni sunt, vel externi. Externi omnibus notissimi. Interni autem duò præcipuè sunt, sensus communis, qui inter res à sensibus externis ad se delatas iudicat, coloremque à sono, odorem à sapore, & frigore differre percipit & partior, quæ de rebus etiam absentibus quandam cogitandi vim habet, et præterita recordatur. His omnibus sensibus tum internis, tum externis propria, & sua voluptas est attributa. Nam & sensibus externis perspicuè sunt quedam ex rebus obiectis maximè consentaneæ, nec minus sensui cõmuni, qui quasi fons exteriorum est, et rerum imagines ad se delatas perfectissimè iudicat. Iucundum etiam est præteritam voluptatem memoria repetere, & futuram cogitatione præcipere; quod alterius interni sensus esse proprium diximus. Cum igitur voluptas partim in sensu, partim in mente consistat, Plato tamen illas tantum, qui-

bus perfusi sensus mouentur, videtur voluptates appellare (quem sequutus Marcus Tullius definiuit voluptatem iucundum motum in sensu) menti verò letitiam, & gaudium tribuit, ut ex Marsilio Ficino in libro de voluptate sententiam Platonis accuratè explicante intelligi potest. Aristoteles autè à voluptate gaudium non distinxit, eamquè menti etiam conuenire est arbitratus, quem nos in præsentia sequimur. Quanquàm nonnullis in locis Platonem ipse sequi videtur, ut cum bonum distribuit in treis partes, quarum una in honestate consistit, altera in utilitate, tertia à voluptate dicitur. Qua quidem in partitione satis apparet, voluptatem eam tantum intelligi, quæ permulcet, & delinit sensum. Cum enim utilitas à vegetabili animæ parte ducatur (utile enim illud dicimus, quod ad salutem, & incolumitatem vel dandam, vel conseruandam, vel restituendam etiam facit, incolumitas autem ad animam vegetabilem pertinet) honestas verò in mente locum obtineat suum; clarum, opinor, perspicuumquè est voluptatem ad sensum duntaxat pertinere. Qua propter nunquam in Rhetoricis cum ab honesto, tum ab utili argumentari nos doceret, voluptatis mentionem fecit; quòd in iudicijs,

Re ii

7t

Et in senatu, Vbi viri tantum graues conuenire putantur, voluptatis causa faciundum aliquid, aut omittendum suadere, minimè decorum existimaret. Præterea in libris de moribus cum de voluptate ageret, nominis huius hæreditatem ad voluptates corporis venisse confessus est, propterea quòd plerumquè ijs sese homines dedunt, Et carum sunt omnes participes, easquè solas pleriquè norunt. Exigua igitur controuersia inter Platonem, Et Aristotelem est: Et licet, modò de re ipsa conueniat, ut inter illos, quantum ego possum iudicare, certè conuenit, huic voluptatis voci tum solam commotionem suauem sensus subijcere, tum etiam gaudium intelligentiæ Et mentis. Nos in præsentia voluptatem vniuersè accipimus, ut perceptionem iucundam Et sensus, Et intelligentiæ comprehendit.

Iam verò quot, qualesq; sint intelligentiæ voluptates videamus, qua quidem in re pertractanda scopulos præteruicta oratio liberius fluere iam poterit: Et Siluio etiam erit accommodata. Sentio enim ea, quæ hætenus dicta sunt, spinosiora fuisse, quàm vellem: Nimirum rei de qua agebatur, natura ita ferente. Ac primum voluptas illa occurrit, quæ virtutis munera exequendo, iustè, inquam temperanter, fortiter agendo, familiã, atquè Remp. rectè administrando percipitur. Quo enī gaudio exultare

illū credimus, qui videt in se naturæ ordinē nō peruer-
teri sed mentē, quæ ad imperādū nata erat, princi-
patum obtinere, appetitum verò rationi esse obediē-
tem, non temere ferri? non se auri cupiditate, non ob-
scænarum voluptatum illecebris, quibus multi ita
ducuntur, ut etiam insaniant, à recto, & honesto
vniquam deflectere? instrui à se familiam suam ad
omne officij munus? nullam in Repub: oriri seditio-
nem, quam ipse non comprimat, nullum impendere
periculum, quod non auertat, prodesse deniquè se om-
nibus tanquam terrestrem quendam Deum?

Huic voluptati meo quidem iudicio maximæ illa
altera statim succedit, honos & gloria. Rectè enim
Simonides apud Xenophontem nequè fanè ex
humānis voluptatibus ulla proprius ad il-
lam, qua Deus fruitur, accedere videtur,
quàm hæc quæ de honoribus manat.

Nequè verò honorem in ijs tantum rebus pono,
quæ iam leuia sunt, & communia, ut salutaris, ap-
peti, decedi, assurgere, deduci reduci, sed in amore po-
tius hominum, & pietate. Quæ quidem pietas tan-
ti ponderis est, ut aptius, & maius ipsa præmium
virtuti tribui non possit. Et enim si magnum quid-
dam est, plurimam auri, & argenti vim, multa,
& fructuosa prædia obtinere, quarum quidem rerū
in hac vniuersitate vilissimā conditio est, non ne,

obsecro, maius censei debet possidere animos hominum? qui natura diuini, & cælestes sunt? Verum hæc in tuo Flamini libello de honore diligenter meminisse explicata. Quid verò de illo præstantissimo voluptatis genere, quæ contemplando hauritur, dicendum est? Ea quidem est huiusmodi, ut nihil similis Deorum immortalum vitæ reperiri queat. Etenim cum in illis non doloris, non libidinis faces admoueantur, nulliquè incerti existant casus, profectò nec temperantiæ, nec fortitudini, nec mehercle prudentiæ relinquitur locus. Solum se ipsos intuentes, vitam usquequaq, iucundissimam, summisq, voluptatibus confertissimam degunt. Contemplatio igitur simplicibus illis, & puris mentibus nos simillimos reddit. Hæc autem similitudo multis alijs argumentis apparet. Nam qui contemplationi deditus est, pauca ex rebus externis requirit. Ex quo Socrates, cum aliquandò per forum obambulans mercium copiam, quæ illhîc vendebantur, aspiceret, ita secum loquutus fertur, quàm multis rebus ego non egeo. At qui negocijs civilibus est implicatus, virtutisq, perfectæ omnia officia præstare parat, diuitijs potens, opibus amplius, gloria, & autoritate clarus existat oportet. Quis autem eam vitam, quæ paucioribus ad se tuendam eget, ad Deorum Immortalium maiestatem, qui nullius indiget rei, propius

accedere non putet? Adde quod maximi ponderis est, contemplationem ad solam mentem pertinere mentemquè dum contemplamur, quasi se cum vivere, at cum virtutis officia exequitur, appetitum sibi comitem, & corpus adiungere, & externum ferè quippiam sibi pro fini proponere, ut victoriam, ut civium concordiam. Quemadmodum autem beatiore erimus, cum his corporis vinculis, & compagibus soluta mens erit, atquè omni cupiditatum tumultu liberata, ita quò magis in hac etiam vita à corpore nos seiungemus, mentemquè ipsam secum quasi habitare faciemus, puriorem sine dubio, ac veriore felicitatem, voluptatemquè consequemur. Ex his igitur satis constare arbitror, quantum dignitatis, voluptatis, beatitudinis insit in contemplatione. Postrema mentis nostræ voluptas est liberorum, ut platonice loquar, procreatio. Omnium enim hominum pregnans, & seminibus gravidatum corpus esse, pregnantem etiam animum Plato dicebat. Si ad corpus quidem respicias, filij nostri sunt, quos ex mulierum congressu gignimus; si ad animum, quos virtutum, & scientiarum societate generamus; ut leges, ut Rerum publici institutiones, ut poemata, ut philosophici libri, ut gloria nominis nostri. Hac enim omnia ad largiendam homini

immortalitatem facere videntur, quam ob causam
liberorum procreatio est instituta. Quicunque
igitur corpore fecundi sunt, scæminas amant, & fi-
liorum ortu immortalitatem, & felicitatem se asse-
qui posse putant. Qui verò animum secundum obti-
nent, hi nullos recusant labores, maximaque su-
beunt pericula, quod virtutes, & scientias sibi com-
parent, quarum fructus videre possint, & reliquis
hominibus impartire, atque ex hac re summa ad
ipsos pervenit voluptas. Quapropter apud Xeno-
phontium Prodicum virtutis Dea Venerem ita
increpat. Nec verò, quod acroama iucun-
dissimum ad audiendum est, laudem
tuam unquam audis, aut pulcherrimum
omnium spectaculum ad te ullo pacto
pertinet. Nunquam enim pulchrum ali-
quod opus tuum aspexisti. Cum igitur tot,
tantæque mentis nostræ sint voluptates, videamus
nunc, an cum his illæ, quæ ad sensum per-
tinent, conferri queant. Neque hoc loco pugnabo
autoritate, aut probabilibus rationibus. Id enim cu-
mulatissime Riccius præstitit. Ex voluptatis tan-
tum natura, validissima, ut arbitror, argumenta
eruiam; quibus confirmetur, eam, quæ ad corpus per-
tinet, & permulcet sensus, voluptate mentis longè
esse inferiorem. Illud autem teneatur, quod supe-

perius à nobis positum est, quò melius quæquè facultas est affecta, eò maiorem capere posse voluptatem. Nam maiorem cernendo voluptatem haurimus, si acrem, & acutam, quàm si hebetem oculorum aciem habeamus. Ergo si in vna, eademquè facultate cognoscente, quò melius affecta est, & ad cognoscendum acrior, eò maior emergit voluptas, profecto & inter diuersas facultates, quò quæquè meliorem, & perfectiorem obtinebit statum, eò maioris, & perfectioris voluptatis compotem fore existimare debemus. At mens nostra longè meliore loco, atquè conditione est, quàm reliquæ omnes animæ facultates. Est enim summum, quò artem numerandi imitata natura, ex rerum inanimatarum formis, ex vita, ex sensu quasi per gradus quosdam peruenit: Mentis igitur voluptas mirandum in modum sensuum voluptati præstare censenda est. Quòd si cui fortasse hæc argumentatio obscurior videbitur, est enim ducta ex reconditiore Philosophia, eam, quæ sequitur, atquè ex sensu quodam communi deprompta priorem etiam explicat, attentè audiat. Proponamus nobis ex altera quidem parte vitam beatarum, & diuinarum mentium, ex altera verò brutorum animantium, cum voluptate planè, lique sunt. Quam ex his iucundiores, suauioresquè vitam censebimus? non ne infinitis propè partibus

cælestium animorum voluptatem excellere indicabimus? Quid ita? quoniam soluta illa, & libera mentes longè perfectiorem, ac præstantiorem, quàm bruta animantia, sunt sortita naturam. Cogitemus enim, quàm velimus, aliam causam non reperiemus. Deinde illud etiam animis occurrat nostris, ex ipsis diuinis mentibus, quò quæq; propius ad Principis illius Dei, qui hunc Mundum regit, naturam accedit, eò maiore frui voluptate, ac felicius vivere. Eadem ratione cum mens nostra longè perfectioris naturæ sit, quàm sensus, multoquæ propius absit ab illo præstantissimæ, & sapientissimæ mentis numine, quis, nisi planè sit excors, negare audeat, voluptatem etiam, quàm mente percipimus, multò cognatiorem, similioremq; diuinæ voluptati esse, quàm illam, quæ ad sensum pertinet? idcircoq; maiorem, præstabiliorem, optabiliorem esse? Quapropter si qui oblitum mentem habere, qua Deorum immortalium vim, & maiestatem in terris referimus, non ad ipsorum Deorum vitam adhibent cogitationem, sed bestiarum potius vitam intuentes, & quoniam eas vident solo sensu voluptatem comprehendere, & ad eam summo cupiditatis ardore ferri, earum iudicio, quasi animi augures, standum sibi putant, eandemque sibi consecrandam voluptatem, ij belluæ sunt humana specie, atque figura. Huius-

modi enim voluptas, ut Plato dicebat, quem verè Riccius Heroem nostrum appellavit, quasi clavum tenens, animum corpori affigit, atque coniungit, efficitque ut infectius corporea qualitate, & specie ea putet esse vera bona, quæ corpus, & sensus suadeat, itaque cum alienam induerit speciem, suam miser exiit multò nobiliorem, ac perfectiorem. Sed quoniam multi, qui nullam unquam mente voluptatem perceperunt, ad hanc veritatis ipsius vocem obsurdescunt, semperque voluptatem illam, quæ ex usu rerum venerearum percipitur, opponunt, semper hanc unam prædicant, & admirantur. Agè quàm isti stultè summo se in errore versari non intelligant, expendamus. Fingant enim isti, si modo animi aciem ad ullam præclaram cogitationem possunt intendere, hominem esse, qui oculis diu fuerit captus, atque idem eodem planè temporis puncto quantumvis pulchra muliere potiatur, & præstantis alicuius medici ope usuram lucis acquirat. Tum verò non ne aperte sentiunt multò maiorem ex mulieris aspectu, quàm ex corporum congressione ad illum peruenturam esse voluptatem? Quid ergo tam multos in errorem inducit? Primum in omnibus fermè rebus copia vilitatem, vilitas satietatem, & contemptum parere solet.

Qua propter nihil mirum, cum visu, dum vigila-
 mus, utamur assidue; rebus autem venereis perra-
 rò, si cernendi voluptas non aequè, ac ista nos feriat,
 & commoueat. Ab ijs enim, quibus multum as-
 sueti sumus, ferè non afficimur. Deinde voluptas,
 quæ tactu percipitur, ut superius ostendimus, dolo-
 ri semper est annexa, atquè coniuncta. Nullam
 enim rebus venereis utentes sentiremus voluptatè,
 nisi quidam quasi pruritus nos excitaret, vel con-
 uelleret potius. Quamobrem huiusmodi volupta-
 tem non dissimilem esse ab ea Plato dicebat, quam
 sentire solemus, cum sanguis bilio, us, & acefcens, è
 cute erumpens stimulus quibusdàm pungit, huicquè
 molestiæ scalptione, vel asperæ alicuius rei fricatione
 subuenimus. Hæc igitur voluptas, quæ ad tactum
 pertinet, semper habet socium adiunctum, dolorem.
 Quod quidem in visu, auditu, atquè olfactu nō eue-
 nit. Etenim cum suauem aliquem colorem intuen-
 tes voluptate afficimur, aut concinnam harmoniam
 audientes, aut gratum olfacientes odorem, nullo ta-
 men prius dolore torquebamur. Quòd si oculis, aut
 auribus captos marere atquè, excruciaci videmus,
 non ideo id euenit, ut superius declarauimus,
 quòd intus aliquid vellicet, & fodicet, ut in tactu,
 sed quoniam quibus bonis, quibusquè voluptatibus
 priuari sint, non cogitare non possunt. Ergo cum na

tur, & instinctu dolorum cupidissime fugiamus, voluptas autem ad tactum pertinens medicinam dolori afferat, et præterea cum contraria si propinqua sint, magis eluceant, voluptas autem huiusmodi non modo sit propinqua dolori, sed planè adiuncta, atquè annexa, nihil mirum si maior, atquè optabilior cernendi voluptate appareat. Quòd si vtriusquè vis, & natura spectetur, longè secus rem se habere, ut satis ostendimus, censendum est. Atquè hoc loco illud ex Platone animaduertatur, hoc, quod dicimus maius, duplicem habere in qualitatibus notionem. Aliquando enim maius album, exempli causa, illud appellamus, quod maius occupat spatium, ac mole ipsa excedit, ut si diceremus parietem dealbatum esse maius album, quàm tantulam niuem. Aliquando autem quod vi ipsius candoris præstat, & ab alterius coloris admistione purius est, qua notatione portionem niuis, quamvis exiguam, maius esse album dicemus. Sic in re proposita nonnunquam maiorem voluptatem in tactu, & corporum congressione esse dicimus; quoniam hæc voluptas quasi mole quadam reliquas excedit. Occupant enim vniuersum hominem, et concutit. Aliquando autem visu, & auditu maiorem percipi voluptatem asserimus, quoniam hæc verior, purior, integrior, quàm illa, voluptas est. Desinamus igitur huius-

Videretur, obsecro, te inquit Malegutius, ut antequā ad alia accedas, causā afferas, cur si mentis voluptates sunt maximæ, omnes tamē sensuū ferē voluptates avidius sequamur. Causa, inquit Madius satis in promptu est. Primum ratio, & mens primis temporibus ætatis non expergiscitur, sed sensu utimur, idcircoq; eam tantum percipimus voluptatem, quæ sensibus coniuncta est, quam cum pleriq; non probe educati, atq; instituti cohibere, et frænare non discant, mirandum non est, si tantas vires sumat, ut adultera etiam ætate, et exorto rationis lumine, ipsa tamē adhuc sibi vendicet principatum. Deinde ad hanc rē illud quoq; plurimū facit, quod sensus suas obeunt actiones absq; labore, disciplinæ, et exercitationis non indigentes. Neq; enim cernere, audire, tangere, vllus in quā didicit, sed simulatq; in lucem editi sumus, nisi vis aliqua naturalem corporis nostri statū perturbet, istis facillimē, cōmodissimēq; fungimur muneribus. Quapropter voluptates etiā, quæ ad sensus pertinent, vltro sese nobis offerūt, atq; dant. Mens autē, nisi diligēter excolatur, nisi magistra vitæ Philosophia accesserit, aut nihil aget, aut perperā aget. Ut igitur rectē agat, rectēq; agēdo capiat voluptatē, multi prius labores nobis substinēdi sunt, sepe frigus, sepe æstus est perferendus. Ex quo doctissimus Poeta Horatius, quē Riccius etiam hodie laudauit, dixit.

„ Qui cupit optatam cursu contingere metam
 „ Multa tulit, fecitque puer, sudavit, & alsit.
 Aristoteles autem studiorum radices amaras esse,
 quamuis fructus sint dulcissimi, dicere solitus erat.
 Quoniam igitur pleraque pars hominum in ea fe-
 runtur, quæ sine molestia comparantur, propterea
 sensuum voluptatibus multò plures, quàm mentis,
 & intelligentiæ addictos videmus. Præclare enim
 Terentius.

Omnes homines à labore procliues ad libidinem.
 Iam, inquam ego, propè esse illud tempus spero, cum
 nostram litem dirimes. Nisi enim fallor, ipsa rerù
 series, atque connexio eò te trahit. Non falleris in-
 quit. In manus igitur sumamus, atque excutiamus
 argumenta tua, & videamus diligenter, sint ne
 demonstrationes necessarie, an probabiles tantum-
 modò. Non molestè enim, opinor, feres rationes
 meas cum tuis rationibus contendere, atque aliquas
 ex tuis, tanquàm inanes concidere, & confutari.
 Primum illud abste allatum argumentum fuit
 (nam & numerum, & ordinem argumentorum
 tuorum, operam dedi, ut memoria retinerem) cum
 felicitatis notioni sit ita adiuncta voluptas, ut neq;
 etiam cogitatione ab ea auelli queat, inter ea, quæ
 maxima bona sunt, esse connumerandam volupta-
 tem. Si de illo præstantissimo voluptatis genere,
 que

que ex rectè factis, aut ex contemplatione percipitur; intelligas, ad sententiam tuam licet adscribas quoq; iudicium meum. Nequè Rictium puto contra dicturum. Sin ad summam felicitatis omnes debere accedere voluptates existimas, tota, ut aiunt erras via. Nihil enim felicitas admittere potest, ne à se ipsa dissentiat, quod virtuti repugnet. Multæ autem voluptates acerrimæ virtutis aduersariæ reperiuntur. Minimè tamen contemnenda est ratio illa, qua ut omnem voluptatem bonam esse probares, secundo loco utebaris. Ita enim dixisti, cum contrariorum contraria soleant esse consequentia, dolor autem omnis, sed etiam labor malus sit, ac naturæ repugnans, certè voluptatem omnem bonam, naturæque amicam esse oportere. Id hoc pacto conuenienter ijs, quæ ab Aristotele scribuntur, dissoluitur. Voluptas omnis suapte natura bona est, est enim perfectæ, absolutæq; muneris functio, sed euentu quodam sit mala. Quod hoc pacto ostendemus. Voluptatum altera alteri non mediocri est impedimento. Ea enim est animæ nostræ partium inter se naturæ coniunctio, & quasi consensus, ut cum una attentius in suum incumbit officium, reliquæ à suis vacent, & quasi ferias agant. Apparet istud apertissimè in sensibus. Etenim si ex pulchræ mulieris aspectu magna ad animum nostrum affluat,

Et illabatur voluptas. Cytharedum eodem tem-
 poris momento scitissimè canentem non ferè audi-
 mus. Item qui fabulam spectant, quamvis fame,
 Et siti laborent, tamen dum nobiles recitant hystrio-
 nes, nec famem, nec sitim sentiunt. Eadem inter
 sensum, Et mentem ratio est. Nam si mentem
 tanquàm arcum intentum habeamus, Et in maxi-
 marum rerum contemplatione simus occupati, in
 corpore sensum adesse vix credas, ut de Socrate, et
 Archimede ferunt. Rursus cum cupiditatis ardo
 re incitamur, cum doloris admouentur faces, cum
 iracundia effertur, tunc menti incredibiles offun-
 duntur tenebræ, ut nullum planè extet ipsius lumi-
 nē. Non modò enim præclarū quispiam cogitare, sed ne
 cogitare quidē omninò possumus: ita domināte cupi-
 ditate obcæcatur ratio, atq; extinguitur. Ex quo dice-
 bat Aristotēles unius facultatis voluptatē ab alie-
 nis voluptatibus æquè tolli, atq; à proprijs doloribus.
 Quamobrem, si sensus magnis voluptatibus titil-
 lentur, mentem perturbari, atq; à suis muneribus
 vacare planè necesse est. Ergo voluptates istæ, si
 cum facultatibus illis, quarum propriæ sunt volu-
 ptates, cōferantur, omnes suapte natura bonæ sunt,
 Et expetendæ; euentu autem quodam male red-
 duntur, si adeò sint vehementes, ut mentem impe-
 dian, atq; perturbent. Magis enim immodera-

te sunt, quàm natura non dico sentientis animæ, sed ipsius hominis postulet, proptereaquæ falsæ voluptates appellantur, non sentientem animam spectando, sed naturam hominis, à qua sunt discrepantes, et alienæ, cum tamen voluptatē ex cōuenientia, nō ex discrepantia oriri posuerimus. Ergo ne voluptates quidē appellari queunt. Quod autē voluptas aliqua euētū quodā reddatur mala, absurdū nō est; cū aliquis dolor similiter bonus reddi possit. Dolores enim illi, qui honestatis, virtutisque colendæ causa substinentur, homini boni sunt, et expetendi; quamuis facultatem illam animæ sentientis, ad quam propriè pertinent, ledant mirificè, & offendant.

Hac eadem ratione tertium argumentum reprehenditur. Sensus enim vtiliter nobis à natura tributus est, atquæ eiusdem sensus appetitiones; nequæ id nos negamus, qui aliquas etiam sensu capi voluptates æquum existimamus. Sed illud apprimè curandum est, ut intrā modum. Periculum enim magnum est, nè nimis sensus voluptates mentem obruant, atquæ extinguant. Quartum verò argumentum, ut Siluius dixit, verissimum, atquæ firmissimum est, quod vnum, ut arbitror, ex animo protulisti. Reliqua autem disputationis potius causa, atquæ ut me refellentem audires, voluptas profecto ista, quæ virtutis, ac sapientiæ comes est, à

me etiam maximis laudibus est affecta, nequè tamen aut ego, aut tu satis dignè illam laudare potuimus. Nulla enim vel eloquentissimi hominis oratio rei ipsius magnitudini vnquam respondebit. Quòd si Riccius in voluptatem acerbissimè inuectus est, eam se intelligi voluisse confitebitur, quam vnam vulgus noscit, ac nominat voluptatem. Ea enim, præsertim si modum excedat, omninò est reprehendenda. Quæ nam esset vis, & natura voluptatis definitione, ut mihi quidem videtur, decretis Aristotelis consentanea, congruenteq; aperuimus. Deindè in sensu, & intelligentia consistere declarauimus, atquè in ipsius intelligentiæ priore, quam nostri rectam nominant, perceptione, nò in posteriore, quàm idem reflexam vocant. Tùm verò voluptatis partitionem attulimus, quotq; & quantæ mentis essent voluptates, quot item animæ sentientis ostendimus. Postremò partes has voluptatis inter se comparantes, atquè conferentes, illas, quæ ad mentem pertinent, veræquè, & germanæ hominis voluptates sunt, potissimum autem illam, quæ ex rerum maximarum contemplatione percipitur, ceteris omnibus mirandum in modum excellere iudicauimus. Quam ob rem omnia ferè, quæ ad hunc locum illustrandum faciebant, satis iam videntur exposita. Exoriuntur autem in homine voluptate accepta,

haustaque sensibus, aut intelligentia, innumerabiles affectiones, Amor, Desiderium, Spes, Elatio, & quasi exaggeratio quædam animi, & quædam etiam in ipso corpore intimæ illius dulcedinis vestigia imprimuntur. Quasi enim liquefieri videtur corpus, atque omnino mirabiliter commouetur, & concitatur. In puris autem illis, & solutis mentibus ex ijs, quæ ad animam appetentem pertinent, soli amori relictus est locus. Cum enim duplex finis inueniatur, ut Aristoteles inquit duodecimo libro Theologiæ (quamuis locus ille à nemine sit satis explicatus) alter qui non est, ut egroti finis est bona valetudo, quæ adhuc non existit, alter qui est, ut Principem illum Deum sibi ipsi, & cæteris beatis mentibus præsentem semper esse finem dicimus; ad finem qui non est: desiderium, ad eum autem qui est, amor pertinet. Quapropter felicissima mentium illarum vita censenda est, cum maximas, & purissimas capiant voluptates; semperque suo fini hæreant, & sint copulatæ, summa quidem illa, & præstantissima suum in se finem, omnemque perfectionem inclusam gerens, reliquæ autem primæ tanquam formæ vndequaque perficienti perpetuo coniunctæ.

Hæc habui, quæ ita de improviso dicerem. Aliàs fortasse totam hanc rem accuratius, atque cumulatius

persequemur. Nunc tempus est, ut cœnatū eamus; si modo Riccio, ac Flaminio, expleui animum, atq; huic meæ sententiæ standum sibi putant. Ego verò, inquit Riccius, nihil verius, aut sapientius dici potuisse affirmo. Optimè, inquam, inter nos convenit. Nam, ut semper Philosophos omnes, ita in hac disputatione te ipsum mihi superare visus es. Quapropter tentare statui, an ea, quæ hodiè dicta sunt, in commentarium referre possim. Aueo enim illa multis, amicis meis communicare, & præsertim Io. Baptistæ Seriusio, Ptolomeo Porticio, Io. Baptistæ Minutolio honestissimis. Adolescentibus, quorum singulari eruditione ac probitate, magnum decus ad patriam meam esse accessurum confido. Ac si processerit, mittam etiā ad Leliura Taurellium, et Philippum Meliorium, hunc prudentia, eruditione, gravitate summa comitate, & iucunditate condita admirabilem, illum eximia iuris ciuilis scientia, maximarum rerum cognitione, sapientia, probitate probatissimis ex omni antiquitate viris conferendum. Quæ cum dicta essent, & omnes me ad id, quod pollicitus eram, præstandum cohortarentur, surreximus, ac paulo post lauti accubuimus. Quod quidem conuiuium, cum Madij sermo, tanquam optimum condimentum accederet, huiusmodi fuit, ut satis sciam celebres illas Platonis cœnas, nequè in præ-